

---

# UdakashAnti Mantra

उदकशान्ति मन्त्रः

## Document Information

---

Text title : Udaka Shanti

File name : udakashaanti.itx

Category : veda, svara

Location : doc\_veda

Author : Vedic Tradition

Transliterated by : Rajagopal Iyer

Proofread by : Rajagopal Iyer,

Description-comments : prescribed in baudhaayana's dharma suutraa which specifies which anuvvaka/panchashati-s are to be chanted and in what sequence

Source : Two books of udakashaanti prayoga- one from Madras, One from gokarNa (Joglekar shastri), Another collated from the Satwalekar's a.nhitaa and anandaashram,pune

Latest update : Aug 03, 2000, July 10, 2022

Send corrections to : sanskrit at cheerful dot c om

---

This text is prepared by volunteers and is to be used for personal study and research. The file is not to be copied or reposted without permission, for promotion of any website or individuals or for commercial purpose.

**Please help to maintain respect for volunteer spirit.**

---

Please note that proofreading is done using Devanagari version and other language/scripts are generated using **sanscript**.

---

June 18, 2025

*sanskritdocuments.org*

---

## UdakashAnti Mantra

### उदकशान्ति मन्त्रः



#### सस्वरः

ॐ

ब्रह्मजज्ञानं प्रथमं पुरस्तात् विसीमतस्सुरुचो वेन आवः ।  
सबुध्निया उपमास्यविष्टः सतश्च योनिमसत्श्चविवः ॥  
आपो वा इदं सर्वं विश्वा भूतान्यापः प्राणा वा आपः  
पशव आपोऽन्नमापोऽमृतमापः सम्राडापो विराडापः  
स्वराडापश्छन्दा स्यापो ज्योती ष्यापो  
यजू ष्यापस्सत्यमापस्सर्वा देवता आपो  
भूर्भुवस्सुवराप ॐ ॥

अपः प्रणयति । श्रद्धावा आपः ।  
श्रद्धां एवारभ्य प्रणीय प्रचरति  
अपः प्रणयति । यज्ञो वै आपः ।  
यज्ञं एवारभ्य प्रणीय प्रचरति  
अपः प्रणयति । वज्रो वै आपः ।  
वज्रमेव भ्रातृव्येभ्यः प्रहृत्य प्रणीय प्रचरति ।  
अपः प्रणयति । आपो वै रक्षोग्नीः ।  
रक्षसां अपहत्यै ।  
अपः प्रणयति । आपो वै देवानां प्रियंधाम ।  
देवानामेव प्रियंधाम प्रणीय प्रचरति ।  
अपः प्रणयति । आपो वै सर्वा देवताः ।  
देवता एवारभ्य प्रणीय प्रचरति ।  
आपोवैशान्ताः । शान्ताभिरेवास्य शुचं शमयति ॥

देवो वस्सविता उत्पुनातु । अच्छिद्रेण पवित्रेण । वसोः सूर्यस्य रश्मिभिः ।  
स हि रत्नानि दाशुषै सुवाति सविता भगः । तं भागं चित्रमीमहे ॥

ॐ

अग्निमीळे पुरोहितं यज्ञस्य देवमृत्विजम् । होतारं रत्नधातमम् ॥  
इषेत्वोर्जे त्वा वायवस्थोपायवस्थ देवो वः सविता प्रापयतु श्रेष्ठतमाय कर्मणे ॥  
अग्र आयाहि वीतये गृणानो हव्यदातये । निहोता सत्सि बर्हिषि ॥  
शन्नो देवीरभिष्टय आपो भवन्तु पीतये । शंयोरभिस्रवन्तु नः ॥  
कृणुष्व पाजः प्रसितिन्न पृथ्वीं याहि राजेवामवा इभेन ।  
तृष्वीमनु प्रसितिं द्रूणानोऽस्ताऽसि विध्य रक्षसस्तपिष्ठैः ॥  
तव भ्रमास आशुया पतन्त्यनु स्पृश धृषता शोशुचानः ।  
तपूष्यग्रे जुह्वा पतङ्गानसन्दितो वि सृज विष्वगुल्काः ॥  
प्रति स्पशो वि सृज तूणितमो भवा पायुर्विशो अस्या अदब्धः ।  
यो नो दूरे अघशसो यो अन्त्यग्रे माकिष्टे व्यथिरादधर्षीत् ॥  
उदग्रे तिष्ठ प्रत्याऽऽतनुष्व न्यमित्रा ओषतात् तिग्महेते ।  
यो नो अराति ओ समिधान चक्रे नीचा तं धक्ष्यतसं न शुष्कम् ॥  
ऊर्ध्वो भव प्रति विध्याध्यस्मदाविष्कृणुष्व दैव्यान्यग्रे ।  
अव स्थिरा तनुहि यातुजूनां जामिमजामिं प्र मृणीहि शत्रून् ॥  
स ते जानाति सुमतिं यविष्ठ य ईवते ब्रह्मणे गातुमैरत् ।  
विश्वान्यस्मै सुदिनानि रायो द्युम्रान्यर्यो वि दुरो अभि द्यौत् ॥  
सेदग्रे अस्तु सुभगस्सुदानुर्यस्त्वा नित्येन हविषा य उक्थैः ।  
पिप्रीषति स्व आयुषि दुरोणे विश्वेदस्मै सुदिना सासदिष्टिः ॥  
अर्चामि ते सुमतिं घोष्यर्वाक् सन्ते वावाता जरतामियं गीः ।  
स्वश्वास्त्वा सुरथा मर्जये मास्मे क्षत्राणि धारयेरनु द्यून् ॥  
इह त्वा भूर्या चरे दुपत्मन्दोषावस्तर्दी दिवा समनु द्यून् ।  
क्रीडन्तस्त्वा सुमनसस्सपेमाभि द्युम्ना तस्थिवा सो जनानाम् ॥

यस्त्वा स्वश्वस्सु हिरण्यो अग्न उपयाति वसुमता रथेन ।  
 तस्य त्राता भवसि तस्य सखा यस्त आतिथ्यमानुषग् जुजोषत् ॥  
 महो रुजामि बन्धुता वचोभिस्तन्मा पितुर्गोतमादन्वियाय ।  
 त्वन्नो अस्य वचसश्चिकिद्धि होतर्यविष्ठ सुक्रतो दमूनाः ॥  
 अस्वप्रजस्तरणयस्सुशेवा अतन्द्रासोऽवुका अश्रमिष्ठाः ।  
 ते पायवस्सप्रियञ्चो निषद्याऽग्ने तव नः पान्त्वमूर ॥  
 ये पायवो मामतेयन्ते अग्ने पश्यन्तो अन्धन्दुरितादरक्षन् ।  
 ररक्ष तान्त्सुकृतो विश्ववेदा दिप्सन्त इद्रिपवो नाह देभुः ॥  
 त्वया वयं सधन्यस्त्वोतास्तव प्रणीत्याश्याम वाजान् ।  
 उभा शंसा सूदय सत्यतातेऽनुष्टुया कृणुह्यहयाण ॥  
 अया ते अग्ने समिधा विधेम प्रति स्तोमं शस्यमानं गुभाय ।  
 दहाशसो रक्षसः पाह्यस्मान्द्रुहो निदो मित्रमहो अवद्यात् ॥  
 रक्षोहणं वाजिनमाऽऽजिघर्मि मित्रं प्रथिष्ठमुपयामि शर्म ।  
 शिशानो अग्निः क्रतुभिस्समिद्धस्स नो दिवा स रिषः पातु नक्तम् ॥  
 विज्योतिषा बृहता भात्यग्निराविर्विश्वानि कृणुते महित्वा ।  
 प्रादेवीर्मायास्सहते दुरेवाः शिशीते शृङ्गे रक्षसे विनिक्षे ॥  
 उत स्वानासो दिविषन्त्वग्नेस्तिग्मायुधा रक्षसे हन्त वा उ ।  
 [मदे चिदस्य प्ररुजन्ति भामा न वरन्ते परिबाधो अदेवीः ॥ ]  
 (The line in [ ] is usually not chanted for auspicious occasions and  
 is included for completeness.)

इन्द्र वो विश्वतस्परि हवामहे जनेभ्यः । अस्माकमस्तु केवलः ।  
 इन्द्रन्नरो नेमधिता हवन्ते यत्पार्या युनजते धियस्ताः ।  
 शूरो नृषाता शवसश्वकान आ गोमति व्रजे भजा त्वन्नः ।  
 इन्द्रियाणि शतक्रतो या ते जनेषु पञ्चसु । इन्द्र तानि त आ वृणे ।  
 अनु ते दायि मह इन्द्रियाय सत्रा ते विश्वमनु वृत्रहत्यै ।  
 अनु क्षत्रमनु सहो यजत्रेन्द्र देवेभिरनु ते नृषह्यै ।

आ यस्मिन्त्सप्त वासवास्तिष्ठन्ति स्वारुहो यथा ।  
 ऋषिर्ह दीर्घश्रुत्तम इन्द्रस्य घर्मो अतिथिः ।  
 आमासु पक्कमैरय आसूर्य रोहयो दिवि ।  
 घर्मन्न सामन्तपता सुवृक्तिभिर्जुष्टं गिर्वणसे गिरः ।  
 इन्द्रमिद्वाथिनो बृहदिन्द्रमर्केभिरर्किणः । इन्द्रं वाणीरनूपत ।  
 गायन्ति त्वा गायत्रिणोऽर्चन्त्यर्कमर्किणः ।  
 ब्रह्माणस्त्वा शतक्रतवुद्ध शमिव येमिरे ।  
 अ होमुचे प्र भरेमा मनीषा मोषिष्ठदात्रे सुमतिं गृणानाः ।  
 इदमिन्द्र प्रति हव्यं गृभाय सत्याः सन्तु यजमानस्य कामाः ।  
 विवेष यन्मा धिषणा जजान स्तवै पुरा पार्यादिन्द्रमहः ।  
 अ हसो यत्र पीपरद्यथा नो नावेव यान्तमुभये हवन्ते ।  
 प्र सम्राजं प्रथममध्वरणाम हो मुचं वृषभं यज्ञियानाम् ।  
 अपान्नपातमश्विना हयन्तमस्मिन्नर इन्द्रियं धत्तमोजः ।  
 वि न इन्द्र मृधो जहि नीचा यच्छ पृतन्यतः ।  
 अधस्पदन्तमीं कृधि यो अस्मा अभिदासति ।  
 इन्द्र क्षत्रमभि वाममोजोऽजायथा वृषाभ चर्षणीनाम् ।  
 अपानुदो जनममित्र यन्तमुरुं देवेभ्यो अकृणोरु लोकम् ।  
 मृगो न भीमः कुचरो गिरिष्ठाः परावतः आ जगामा परस्याः ।  
 सूक स शाय पविमिन्द्र तिग्मं विशत्रून् ताढि विमृधो नुदस्व ।  
 वि शत्रून् वि मृधो नुद वि वृत्रस्य हनू रुज ।  
 विमन्युमिन्द्र भामितोऽमित्रस्याभिदासतः ।  
 त्रातारमिन्द्रमवितारमिन्द्र हवे हवे सुहव शूरमिन्द्रम् ।  
 हुवे नु शक्रं पुरुहूतमिन्द्र स्वस्ति नो मघवा धात्विन्द्रः ।  
 मा ते अस्या सहसावन् परिष्ठावधाय भूम हरिवः परादै ।  
 त्रायस्व नोऽवृकेभिर्वरुथैस्तव प्रियासस्सूरिषु स्याम ।  
 अनवस्ते रथमश्वाय तक्षन् त्वष्टा वज्रं पुरुहूत द्युमन्तम् ।  
 ब्रह्माण इन्द्रं महयन्तो अर्कैरवर्धयन्नहये हन्त वा उ ।

वृष्णे यत् ते वृषणो अर्कमर्चानिन्द्र ग्रावाणो अदितिस्सजोषाः ।  
 अनश्वासो ये पवयोऽरथा इन्द्रेषिता अभ्यवर्तन्त दस्यून् ।  
 यत् इन्द्र भयामहे ततो नो अभयं कृधि ।  
 मघवच्छृग्धि तव तन्न ऊतये विद्विषो विमृधो जहि ।  
 स्वस्तिदा विशस्पतिर्वृत्रहा विमृधो वशी ।  
 वृषेन्द्रः पुर एतु नः स्वस्तिदा अभयंकरः ।  
 महाँ इन्द्रो वज्रबाहुः षोडशी शर्म यच्छतु ।  
 स्वस्ति नो मघवा करोतु हन्तु पाप्मानं योऽस्मान् द्वेष्टि ।  
 सजोषा इन्द्र सगणो मरुद्भिस्सोमं पिब वृत्रहच्छूर विद्वान् ।  
 जहि शत्रूँ रपमृधोनुदस्वाथाभयं कृणु हि विश्वतो नः ।  
 ये देवाः पुरस्सदोऽग्नि नैत्रा रक्षोहणस्तेनः पान्तु  
 ते नोऽवन्तु तेभ्यो नमस्तेभ्यः स्वाहा  
 ये देवा दक्षिणसदो यमनैत्रा रक्षोहणस्तेनः पान्तु  
 ते नोऽवन्तु तेभ्यो नमस्तेभ्यः स्वाहा  
 ये देवा पश्चात् सदसवितृ नैत्रा रक्षोहणस्तेनः पान्तु  
 ते नोऽवन्तु तेभ्यो नमस्तेभ्यः स्वाहा  
 ये देवा उत्तरसदो वरुणनेत्रा रक्षोहणस्तेनः पान्तु  
 ते नोऽवन्तु तेभ्यो नमस्तेभ्यः स्वाहा  
 ये देवा उपरिषदो बृहस्पतिनेत्रा रक्षोहणस्तेनः पान्तु  
 ते नोऽवन्तु तेभ्यो नमस्तेभ्यः स्वाहाऽग्रये रक्षोघ्ने स्वाहा यमाय रक्षोघ्ने स्वाहा  
 सवित्रे रक्षोघ्ने स्वाहा वरुणाय रक्षोघ्ने स्वाहा बृहस्पतये दुवस्पते रक्षोघ्ने स्वाहा ।  
 अग्निरायुष्मान्त्स वनस्पतिभिरायुष्मान्तेन त्वाऽऽयुषाऽऽयुष्मन्तं करोमि ।  
 सोम आयुष्मान्त्स ओषधीभिरायुष्मान्तेन त्वाऽऽयुषाऽऽयुष्मन्तं करोमि ।  
 यज्ञ आयुष्मान्त्स दक्षिणाभिरायुष्मान्तेन त्वाऽऽयुषाऽऽयुष्मन्तं करोमि ।  
 ब्रह्मायुष्मत्तद् ब्राह्मणैरायुष्मत्तेन त्वाऽऽयुषाऽऽयुष्मन्तं करोमि ।  
 देवा आयुष्मन्तस्तेऽमृतेनायुष्मन्तस्तेन त्वाऽऽयुषाऽऽयुष्मन्तं करोमि ।  
 या वामिन्द्रा वरुणा यतव्या तनूस्तयेममँ हंसो मुंचतम् ।

या वामिन्द्रा वरुणा सहस्र्या तनूस्तयेमम हसो मुंचतम् ।  
या वामिन्द्रा वरुणा रक्षस्या तनूस्तयेमम हसो मुंचतम् ।  
या वामिन्द्रा वरुणा तेजस्या तनूस्तयेमम हसो मुंचतम् ।  
यो वामिन्द्रा वरुणावग्नौ सामस्तं वामेतेनाव यजे  
यो वामिन्द्रा वरुणा द्विपात्सु पशुषु सामस्तं वामेतेनाव यजे  
यो वामिन्द्रा वरुणा चतुष्पत्सु पशुषु सामस्तं वामेतेनाव यजे  
यो वामिन्द्रा वरुणा गोष्ठे सामस्तं वामेतेनाव यजे  
यो वामिन्द्रा वरुणा गृहेषु सामस्तं वामेतेनाव यजे  
यो वामिन्द्रा वरुणाप्सु सामस्तं वामेतेनाव यजे  
यो वामिन्द्रा वरुणौषधीषु सामस्तं वामेतेनाव यजे  
यो वामिन्द्रा वरुणा वनस्पतिषु सामस्तं वामेतेनाव यजे ॥

अग्नेयशस्विन्यशसे ममर्पयेन्द्रावतीमपचितीमिहावह ।  
अयं मूर्धा परमेष्ठी सुवचास्समानानामुत्तमश्लोको अस्तु ॥  
भद्रं पश्यन्त उपसेदुरग्रे तपो दीक्षामृषयः सुर्विदः ।  
ततः क्षत्रं बलमोजश्च जातं तदस्मै देवा अभि सन्नमन्तु ॥  
धाता विधात परमोतसंधृक् प्रजापतिः परमेष्ठी विराजा ।  
स्तोमाश्छंदांसि निविदोम आहुरेतस्मै राष्ट्रमभिसन्नमाम ॥  
अभ्यावर्तध्वमुपमेतसाक मय ह्यशास्ताऽधिपतिर्वो अस्तु ।  
अस्य विज्ञानमनुसं रभध्वमिमं पश्चादनु जीवाथ सर्वे ॥  
॥ राष्ट्रभृतम् ॥

ऋतापाडृतधामाग्निर्गन्धर्वस्स इदं ब्रह्मक्षत्रं पातु तस्मै स्वाहा ।  
तस्यौषधयोऽप्सरस ऊर्जो नाम ता इदं ब्रह्मक्षत्रं पान्तु ताभ्यः स्वाहा ।  
सहितो विश्वसामा सूर्यो गन्धर्वः स इदं ब्रह्मक्षत्रं पातु तस्मै स्वाहा ।  
तस्य मरीचयोऽप्सरस आयुवो नाम ता इदं ब्रह्मक्षत्रं पान्तु ताभ्यः स्वाहा ।  
सुषुम्नः सूर्यरश्मिश्चन्द्रमा गन्धर्वः स इदं ब्रह्मक्षत्रं पातु तस्मै स्वाहा ।  
तस्य नक्षत्राण्यऽप्सरसो बेकुरयो नाम ता इदं ब्रह्मक्षत्रं पान्तु ताभ्यः स्वाहा ।

भुज्युस्सुपर्णो यज्ञो गन्धर्वः स इदं ब्रह्मक्षत्रं पातु तस्मै स्वाहा ।  
 तस्य दक्षिणा अप्सरसस्तवा नाम ता इदं ब्रह्मक्षत्रं पातु ताभ्यः स्वाहा ।  
 प्रजापतिर्विश्वकर्मा मनो गन्धर्वः स इदं ब्रह्मक्षत्रं पातु तस्मै स्वाहा ।  
 तस्य कर्मान्यप्सरसो वल्लयो नाम ता इदं ब्रह्मक्षत्रं पातु ताभ्यः स्वाहा ।  
 इषिरो विश्वव्यचा वातो गन्धर्वः स इदं ब्रह्मक्षत्रं पातु तस्मै स्वाहा ।  
 तस्यापोऽप्सरसो मुदा नाम ता इदं ब्रह्मक्षत्रं पातु ताभ्यः स्वाहा ।  
 भुवनस्य पते यस्य त उपरि गृहा इह च ।  
 सनोरास्वाज्यानिॐ रायस्पोषाॐ सुवीर्यंॐ संवत्सरीणांॐ स्वस्तिॐ स्वाहा ।  
 परमेष्ठयधिपतिर्मृत्युर्गन्धर्वः स इदं ब्रह्मक्षत्रं पातु तस्मै स्वाहा ।  
 तस्य विश्वमप्सरसो भुवो नाम ता इदं ब्रह्मक्षत्रं पातु ताभ्यः स्वाहा ।  
 सुक्षितिस्सुभूतिर्भद्रकृत्सुवर्वाण्यर्जन्यो गन्धर्वः स इदं ब्रह्मक्षत्रं पातु तस्मै स्वाहा ।  
 तस्य विद्युतोऽप्सरसो रुचो नाम ता इदं ब्रह्मक्षत्रं पातु ताभ्यः स्वाहा ।  
 दूरे हेतिरमृडयो मृत्युर्गन्धर्वः स इदं ब्रह्मक्षत्रं पातु तस्मै स्वाहा ।  
 तस्य प्रजा अप्सरसो भीरुवो नाम ता इदं ब्रह्मक्षत्रं पातु ताभ्यः स्वाहा ।  
 चारुः कृपणकाशी कामो गन्धर्वः स इदं ब्रह्मक्षत्रं पातु तस्मै स्वाहा ।  
 तस्याधयोऽप्सरसश्शोचयतीर्नाम ता इदं ब्रह्मक्षत्रं पातु ताभ्यः स्वाहा ।  
 सनो भुवनस्य पते यस्य त उपरि गृहा इह च ।  
 उरुब्रह्मणेस्मै क्षत्राय महि शर्म यच्छ स्वाहा ॥  
 नमो अस्तु सर्पेभ्यो ये के च पृथिवीमनु ।  
 ये अन्तरिक्षे ये दिवि तेभ्यः सर्पेभ्यो नमः ॥  
 येऽदो रोचने दिवो ये वा सूर्यस्य रश्मिषु ।  
 येषामप्सु सदः कृतं तेभ्यः सर्पेभ्यो नमः ॥  
 या इषवो यातुधानानां ये वा वनस्पतीं रनु ।  
 ये वाऽवटेषु शेरते तेभ्यः सर्पेभ्यो नमः ॥  
 ॥ पंचचोडाः ॥  
 अयम्पुरो हरिकेशः सूर्यरश्मिस्तस्य रथगृत्सश्च रथोजाश्च सेनानिग्रामण्यौ

पुञ्जिकस्थला च कृतस्थला चाप्सरसौ यातुधाना हेति रक्षसि प्रहेतिस्तेभ्यो  
नमस्ते नो मृडयन्तु ते यं द्विष्मो यश्च नो द्वेष्टि तं वो जंभे दधामि ।  
अयं दक्षिणा विश्वकर्मा तस्य रथस्वनश्च रथे चित्रश्च सेनानिग्रामण्यौ  
मेनका च सहजन्त्या चाप्सरसौ  
दङ्गवः पशवो हेति पौरुषेयोवधः प्रहेतिस्तेभ्यो  
नमस्ते नो मृडयन्तु ते यं द्विष्मो यश्च नो द्वेष्टि तं वो जंभे दधामि ।  
अयं पश्चाद्विश्वव्याचास्तस्य रथप्रोतश्चासमरथश्च सेनानिग्रामण्यौ  
प्रम्लोचन्ती चानुम्लोचन्ती चाप्सरसौ सर्पा हेतिर्व्याघ्राः प्रहेतिस्तेभ्यो  
नमस्ते नो मृडयन्तु ते यं द्विष्मो यश्च नो द्वेष्टि तं वो जंभे दधामि ।  
अयमुत्तरात्संयद्वसुस्तस्य सेनजिच्च सुषेणश्च सेनानिग्रामण्यौ  
विश्वाची च घृताची चाप्सरसावापो हेतिर्वातः प्रहेतिस्तेभ्यो  
नमस्ते नो मृडयन्तु ते यं द्विष्मो यश्च नो द्वेष्टि तं वो जंभे दधामि ।  
अयमुपर्यर्वाग्वसुस्तस्य तार्क्ष्यश्चारिष्टनेमिश्च सेनानिग्रामण्यावुर्वशी  
पूर्वचित्तिश्चाप्सरसौ विद्युद्धेतिरवस्फूर्जन्प्रहेतिस्तेभ्यो  
नमस्ते नो मृडयन्तु ते यं द्विष्मो यश्च नो द्वेष्टि तं वो जंभे दधामि ।  
॥ अप्रतिरथम् ॥

आशुः शिशानो वृषभो न युध्मो घनाघनः क्षोभणश्चर्षणीनाम् ।  
संक्रन्दनोऽनिमिष एकवीरः शतं सेना अजयत्साकामिन्द्रः ॥  
संक्रन्दनेनानिमिषेण जिष्णुना युत्कारेण दुश्चवनेन धृष्णुना ।  
तदिन्द्रेण जयत तत् सहध्वं युधो नर इषुहस्तेन वृष्णा ॥  
स इषुहस्तैः स निषङ्गिभिर्वशी स स्रष्टा स युध इन्द्रो गणेन ।  
स सृष्टजित् सोमपा बाहुशर्ध्वध्वन्वा प्रतिहिताभिरस्ता ॥  
बृहस्पते परि दीयारथेन रक्षोहाऽमित्रा अपबाधमानः ।  
प्रभञ्जन्तसेनाः प्रमृणो युधा जयन्तस्माकमेध्यविता रथानाम् ॥  
गोत्रभिदं गोविदं वज्रबाहुं जयन्तमज्म प्रमृणन्तमोजसा ।  
इमं सजाता अनु वीरयध्वमिन्द्रं सखायोऽनु स रभध्वम् ॥

बलविज्ञायः स्थविरः प्रवीरः सहस्वान् वाजी सहमान उग्रः ।  
 अभिवीरो अभिसत्वा सहोजा जैत्रमिन्द्र रथमा तिष्ठ गोवित् ॥  
 अभिगोत्राणि सहसा गाहमानोऽदायो वीरश्शतमन्युरिन्द्रः ।  
 दुश्च्यवनः पृतनाषाडयुद्धोऽस्माकं सेना अवतु प्र युत्सु ॥  
 इन्द्र आसां नेता बृहस्पतिर्दक्षिन्णा यज्ञः पुर एतु सोमः ।  
 देवसेनानामभिभञ्जतीनां जयन्तीनां मरुतो यन्त्वग्ने ॥  
 इन्द्रस्य वृष्णो वरुणस्य राज्ञ आदित्यानां मरुता शर्ध उग्रम् ।  
 महामनसां भुवनच्यवानां घोषो देवानां जयतामुदस्थात् ॥  
 अस्माकमिन्द्रः समृतेषु ध्वजेष्वस्माकं या इषवस्ता जयन्तु ।  
 अस्माकं वीरा उत्तरे भवन्त्वस्मानु देवा अवता हवेषु ॥  
 उद्धर्षय मघवन्नायुधान्युत् सत्वनां मामकानां महांसि ।  
 उद् वृत्रहन् वाजिनां वाजिनान्युद्रथानां जयतामेतु घोषः ॥  
 उप प्रेत जयता नरः स्थिरा वस्सन्तु बाहवः ।  
 इन्द्रो वश्शर्म यच्छत्वनाधृष्या यथाऽसथ ॥  
 अवसृष्टा परा पत शरव्ये ब्रह्मसंशिता ।  
 गच्छामित्रान् प्रविश मैषां कं चनोच्छिषः ॥  
 मर्माणि ते वर्मभिश्छादयामि सोमस्त्वा राजाऽमृतेनाभिऽवस्ताम् ।  
 उरोर्वरीयो वरिवस्ते अस्तु जयन्तं त्वामनु मदन्तु देवाः ॥  
 यत्र बाणाः सम्पतन्ति कुमारा विशिखा इव ।  
 इन्द्रो नस्तत्र वृत्रहा विश्वाहा शर्म यच्छतु ॥  
 शं च मे मयश्च मे प्रियं च मेऽनुकामश्च मे  
 कामश्च मे सौमनसश्च मे भद्रं च मे श्रेयश्च मे  
 वस्यश्च मे यशश्च मे भगश्च मे द्रविणं च मे  
 यन्ता च मे धर्ता च मे क्षेमश्च मे धृतिश्च मे  
 विश्वं च मे महश्च मे संविच्च मे ज्ञात्रं च मे  
 सूश्च मे प्रसूश्च मे सीरं च मे लयश्च

म ऋ॒तं च॑ मेऽमृतं॑ च॒ मेऽय॑क्ष्मं च॒ मेऽना॑मयच्च मे  
जी॒वातु॑श्च मे दी॒र्घायु॑त्वं च॒ मेऽन॑मित्रं च॒ मेऽभ॑यं च॒ मे  
सु॒गं च॑ मे॒ शय॑नं च॒ मे सू॒षा च॑ मे॒ सु॒दिनं॑ च॒ मे ॥

॥ विह॑व्यम् ॥

ममा॑ग्ने॒ वचो॑ वि॒ह॒वेष्व॑स्तु॒ वयं॑ त्वे॒न्ध्याना॑स्त॒नुवं॑ पु॒षेम॑ ।  
मह्यं॑ नमन्तां प्र॒दिश॑श्च॒तस्र॑स्त्वयाऽध्य॒क्षेण॑ पृ॒तना॑ जयेम ॥  
मम॑ दे॒वा वि॒ह॒वे स॑न्तु॒ सर्व॑ इन्द्रा॒वन्तो॑ म॒रुतो॑ विष्णु॒रग्निः॑ ।  
ममा॑न्तरि॒क्षमु॑रु॒ गोप॑मस्तु॒ मह्यं॑ वातः प॒वतां॑ कामे॒ अस्मिन्॑ ॥  
मयि॑ दे॒वा द्र॒विण॑मा॒ यज॑न्तां म॒य्याशी॑रस्तु॒ मयि॑ दे॒वहू॑तिः ।  
दै॒व्या हो॑तारा॒ वनि॑षन्त॒ पूर्वेऽरि॑ष्टास्स्याम॒ तनु॑वा॒ सुवी॑राः ॥  
मह्यं॑ यजन्तु॒ मम॑ यानि॒ ह॒व्याऽऽकू॑तिः स॒त्या मन॑सो मे अस्तु ।  
ए॒नो मा॑ नि॒ गां क॑त॒मच्च॑नाहं॒ विश्वे॑ दे॒वासो॑ अधि॒ वोच॑ता मे ॥  
दे॒वीर्षड्वो॑र्वी॒रुरु॑णः॒ कृणो॑त॒ विश्वे॑ दे॒वास इ॒ह वी॑र॒यध्व॑म् ।  
मा हा॑स्महि॒ प्रज॑या॒ मा त॑नू॒भिर्मा॑ र॒धाम॑ द्विष॒ते सो॑म रजन् ॥  
अ॒ग्निर्म॑न्युं प्र॒तिनु॑दन् पुर॒स्ताद॑द॒ब्धो गो॑पाः परि॒पाहि॑ न॒स्त्वम् ।  
प्र॒त्यञ्चो॑ यन्तु॒ निगु॑तः पु॒नस्तेऽमै॑षां॒ चित्तं॑ प्र॒बुधा॑ वि॒नेश॑त् ॥  
धा॒ता धा॑तृणां॒ भुव॑नस्य॒ यस्पति॑र्दे॒व स॑वि॒तार॑म॒भिमा॑ति॒षाह॑म् ।  
इ॒मं य॑ज॒नम॑श्विनो॒भा बृ॒हस्प॑तिर्दे॒वाः पा॑न्तु॒ यज॑मान॒न्नय॑र्थात् ॥  
उ॒रुव्य॑चा॒ नो म॑हिष॒शर्म॑ य॒ सद॑स्मिन् ह॒वे प॑रु॒हूतः॑ पुरु॒क्षु ।  
स नः॑ प्र॒जाये॑ ह॒र्यश्च॑ मृ॒डये॑न्द्र॒ मा नो॑ री॒रिषो॑ मा॒ परा॑ दाः ॥  
येन॑स्स॒पत्ना॑ अप॒ ते भ॑वन्त्विन्द्रा॒ग्निभ्या॑म॒व बा॑धामहे॒ तान् ।  
वस॑वो॒ रुद्रा॑ आ॒दित्या॑ उ॒परि॑स्पृश॒ मोग्रं॑ चेत्तार॒मधि॑रा॒जम॑क्रन् ॥  
अ॒र्वाश्च॑मिन्द्र॒ममु॑तो॒ हवाम॑हे॒ यो गो॑जि॒द्धन॑जि॒दश्च॑जिद्यः ।  
इ॒मं नो॑ य॒ज्ञं वि॒ह॒वे जु॑ष॒स्वास्य॑ कु॒र्मो हरि॑वो॒ मेदि॑नं॒ त्वा ॥  
॥ मृ॑गारम् ॥

अग्नेर्मन्वे प्रथमस्य प्रचेतसो यं पाञ्चजन्यं बहवस्समिन्धते ।  
 विश्वस्यां विशि प्रविशिवाँ समीमहे स नो मुञ्चत्वँ हसः ॥  
 यस्येदं प्राणन्निमिषद्यदेजति यस्य जातं जनमानं च केवलम् ।  
 स्तौम्यग्निं नाथितो जोहवीमि स नो मुञ्चत्वँ हसः ॥  
 इन्द्रस्य मन्वे प्रथमस्य प्रचेतसो वृत्रघ्नः स्तोमा उप मामुपागुः ।  
 यो दाशुषः सुकृतो हवमुप गन्ता स नो मुञ्चत्वँ हसः ॥  
 यः संग्रामं नयति संवशी युधे यः पुष्टानि सँसृजति त्रयाणि ।  
 स्तौमीन्द्रं नाथितो जोहवीमि स नो मुञ्चत्वँ हसः ॥  
 मन्वे वाँ मित्रावरुणा तस्य वित्तँ सत्यौजसा दँहणा यन्नुदेथे ।  
 या राजानँ सरथँ याथ उग्रा ता नो मुञ्चतमागसः ॥  
 यो वाँ रथँ ऋजुरश्मिः सत्यधर्मा मिथुश्चरन्तमुपयाति दूष्यन् ।  
 स्तौमि मित्रावरुणा नाथितो जोहवीमि तौ नो मुञ्चतमागसः ।  
 वायोस्सवितुर्विदथानि मन्महे यावात्मन्वद्विभृतो यौ च रक्षतः ।  
 यौ विश्वस्य परिभू बभूवतुस्तौ नो मुञ्चतमागसः ॥  
 उपश्रेष्ठा न आशिषो देवयोर्धमे अस्थिरन् ।  
 स्तौमि वायुँ सवितारं नाथितो जोहवीमि तौ नो मुञ्चतमागसः ॥  
 रथीतमौ रथीनामह्व ऊतये शुभं गमिष्ठौ सुयमेभिरश्वैः ।  
 ययोर्वाँ देवौ देवेष्वनिशितमोजस्तौ नो मुञ्चतमागसः ॥  
 यदयातं वहतुँ सूर्यायास्त्रिचक्रेण सँ सदमिच्छमानौ ।  
 स्तौमि देवावश्विनौ नाथितो जोहवीमि तौ नो मुञ्चतमागसः ॥  
 मरुताँ मन्वे अधि नो ब्रुवन्तु प्रेमां वाचं विश्वामवन्तु विश्वे ।  
 आशून्हुवे सुयमानूतये ते नो मुञ्चत्वेनसः ॥  
 तिग्ममायुधं वीडितँ सहस्वद्विव्यँ शर्दः पृतनासु जिष्णु ।  
 स्तौमि देवान्मरुतो नाथितो जोहवीमि ते नो मुञ्चत्वेनसः ॥  
 देवानाँ मन्वे अधि नो ब्रुवन्तु प्रेमां वाचं विश्वामवन्तु विश्वे ।  
 आशून् हुवे सुयमानूतये ते नो मुञ्चत्वेनसः ॥

यदिदं माऽभि॒शोच॑ति पौरु॒षयेण॑ दैव्येन ।  
 स्तौमि॑ विश्वा॒न्देवान्न॑थितो जोह॒वीमि॑ ते नो मु॒ञ्चत्वेन॑सः ॥  
 अनु॒नोऽद्यानु॑मतिर्यज्ञं दे॒वेषु॑ म् अन्यताम् ।  
 अ॒ग्निश्च॑ हव्य॒वाहनो॑ भवतांदाशु॒षे मयः॑ ॥  
 अन्वि॑दनुमते त्वं म॒न्यासै॑ शं च नः कृधि ।  
 ऋ॒त्वे दक्षाय॑ नो हि नु प्रण॒ आयू॑षि तारिषः ॥  
 वैश्वान॑रो न ऊ॒त्याऽऽप्र॑ यातु परा॒वतः॑ । अ॒ग्निरु॑क्थेन वाह॒सा ॥  
 पृ॒ष्टो दि॒वि पृ॒ष्टो अ॒ग्निः पृ॒थिव्यां॑ पृ॒ष्टो विश्वा॒ ओष॑दीराविवेश ।  
 वैश्वान॑रसहसा पृ॒ष्टो अ॒ग्निस्सनो॑ दि॒वा सा॒रिषः॑ पातु नक्तम् ॥  
 ये अप्र॑थेताममि॒तेभिरो॑जोभि॒र्ये प्रति॑ष्ठे अभ॒वतां॑ वसूनाम् ।  
 स्तौमि॑ द्यावापृथि॒वी नाथि॑तो जोह॒वीमि॑ ते नो मु॒ञ्चतम॑ ह॒सः ॥  
 उर्वी॑ रोदसी वरि॒वः कृ॒णोतं॑ क्षेत्रस्य पत्नी अधि नो ब्रूयतम् ।  
 स्तौमि॑ द्यावापृथि॒वी नाथि॑तो जोह॒वीमि॑ ते नो मु॒ञ्चतम॑ ह॒सः ॥  
 यत् ते व॒यं पुरु॑षत्रा यवि॒ष्टाय॑वि॒ष्टा वि॒द्वा स॒श्वकृ॑मा क॒च्चनाऽऽगः॑ ।  
 कृ॒धी स्व॒स्मा स॑ अदि॒तेर॑नागा व्येना॒सि शि॒श्रथो॑ विष्व॒गग्ने ॥  
 यथा॑ह तद्व॒सवो॑ गौर्यं चि॒त् प॒दिषि॑ताममुञ्चता यजत्राः ।  
 ए॒वा त्वम॑स्मत् प्र मु॒ञ्चाव्य॑ हः प्रा॒तार्य॑ग्ने प्र॒तरान्न॑ आयुः ॥  
 ॥ सर्पा॑हुतीः ॥

स॒मीची॑ नामा॒सि प्राची॑दि॒क्तस्या॑स्तेऽ॒ग्निरधि॑पतिर॒सितो॑ र॒क्षिता॑  
 यश्चादि॑पतिर्यश्च गो॒प्ता ताभ्यां॑ नमस्तौ नो मृ॒डयतां॑  
 ते यं द्वि॒ष्मो यश्च॑ नो द्वेष्टि॒ तं वां जंभे॑ दधामि ।  
 ओ॒ज॒स्विनी॑ नामा॒सि दक्षि॑णा दि॒क्तस्या॑स्त इन्द्रोऽधि॑पतिः पृ॒दाकू॑ र॒क्षिता॑  
 यश्चादि॑पतिर्यश्च गो॒प्ता ताभ्यां॑ नमस्तौ नो मृ॒डयतां॑  
 ते यं द्वि॒ष्मो यश्च॑ नो द्वेष्टि॒ तं वां जंभे॑ दधामि ।  
 प्राची॑ नामा॒सि प्रती॑ची दि॒क्तस्या॑स्ते सोमोऽधि॑पतिः स्व॒जो र॒क्षिता॑  
 यश्चादि॑पतिर्यश्च गो॒प्ता ताभ्यां॑ नमस्तौ नो मृ॒डयतां॑

ते यं द्विष्मो यश्च नो द्वेष्टि तं वां जंभे दधामि ।  
 अवस्थावा नामास्युदीची दिक्तस्यास्ते वरुणोऽधिपतिस्तरश्च राजी रक्षिता  
 यश्चादिपतिर्यश्च गोप्ता ताभ्यां नमस्तौ नो मृडयतां  
 ते यं द्विष्मो यश्च नो द्वेष्टि तं वां जंभे दधामि ।  
 अधिपत्नी नामासि बृहती दिक्तस्यास्ते बृहस्पतिरधिपतिः श्वित्रो रक्षिता  
 यश्चादिपतिर्यश्च गोप्ता ताभ्यां नमस्तौ नो मृडयतां  
 ते यं द्विष्मो यश्च नो द्वेष्टि तं वां जंभे दधामि ।  
 वशिनी नामासीयं दिक्तस्यास्ते यमोऽधिपतिः कल्माषग्रीवो रक्षिता  
 यश्चादिपतिर्यश्च गोप्ता ताभ्यां नमस्तौ नो मृडयतां  
 ते यं द्विष्मो यश्च नो द्वेष्टि तं वां जंभे दधामि ॥  
 ॥ गन्धर्वाहुतीः ॥

हेतयो नामस्थ तेषां वः पुरो गृहा अग्निर्व इषवः सलिलो  
 वातनामं तेभ्यो वो नमस्तेनो मृडयत  
 ते यं द्विष्मो यश्च नो द्वेष्टि तं वो जंभे दधमि ।  
 निलिम्पा नामस्थ तेषां वो दक्षिणा गृहा पितरो वइषवः सगरो  
 वातनामं तेभ्यो वो नमस्तेनो मृडयत  
 ते यं द्विष्मो यश्च नो द्वेष्टि तं वो जंभे दधमि ।  
 वज्रिणो नामस्थ तेषां वः पश्चाद्गृहा स्वप्नो व इषवो गह्वरो  
 वातनामं तेभ्यो वो नमस्तेनो मृडयत  
 ते यं द्विष्मो यश्च नो द्वेष्टि तं वो जंभे दधमि ।  
 अवस्थावानो नामस्थ तेषां व उत्तरद्गृहा आपो व इषवः समुद्रो  
 वातनामं तेभ्यो वो नमस्तेनो मृडयत  
 ते यं द्विष्मो यश्च नो द्वेष्टि तं वो जंभे दधमि ।  
 अधिपतयो नामस्थ तेषां व उपरि गृहा वर्षं व इषवोऽवस्वान्  
 वातनामं तेभ्यो वो नमस्तेनो मृडयत  
 ते यं द्विष्मो यश्च नो द्वेष्टि तं वो जंभे दधमि ।  
 ऋव्या नामस्थ पार्थिवातेषां व इह गृहा अन्नं व इषवोऽनिमिषो

वा॒तना॒मं ते॒भ्यो॒ वो न॒मस्ते॒नो मृ॒डय॒त  
ते यं॑ द्वि॒ष्मो यश्च॑ नो॒ द्वेष्टि॑ तं वो॒ जंभे॑ दधमि ।  
॥ अ॒ज्यानि॑ ॥

श॒तायु॑धाय॒ शत॑वीर्याय॒ शतो॑तयेऽभिमाति॒षाहे॑ ।  
श॒तं यो नः॑ श॒रदो॑ अ॒जीता॑निन्द्रो॒ नेष॑दति॒ दुरि॑तानि॒ विश्वा॑ ॥  
ये च॒त्वारः॑ प॒थयो॑ दे॒वयाना॑ अ॒न्तरा॑ द्यावापृथि॒वी वि॒यन्ति॑ ।  
तेषां॑ यो अ॒ज्यानि॑ म॒जीति॑ मा॒हवा॑त्तस्मै॒ नो दे॒वाः परि॑दत्तेह॒ सर्वे॑ ॥  
ग्री॒ष्मो हे॑मन्त॒ उत॑नो॒ वस॑न्तः श॒रद्व॑र्षाः सु॒वित॑न्नो अस्तु ।  
तेषामृ॒तूनां॑ श॒तशार॑दानां॒ निवा॑त ए॒षाम॑भये॒ स्याम॑ ॥

इ॒दुव॑त्सराय॒ परिव॑त्सराय॒ संव॑त्सराय॒ कृणु॑ता बृ॒हन्न॑मः ।  
तेषां॑ व॒यं सु॑म॒तौ य॒ज्ञिया॑नां॒ ज्यो॒गजी॑ता॒ अह॑ताः॒ स्याम॑ ॥  
भ॒द्रा॒न्नः श्रे॒यः स॑म॒नैष्ट॑ दे॒वास्त्वया॑ऽव॒सेन॑ स॒मशी॑महि॒ त्वा ।  
स नो॑ म॒योभूः॑ पि॒तो आ॑वि॒शस्व॑ श॒न्तोका॑य॒ तनु॑वं॒ स्यो नः॑ ॥  
भू॒तं भव्यं॑ भ॒विष्य॑द्व॒षद्वाहा॑ न॒म ऋ॑क्सामय॒जुर्व॑षद्वाहा॒ नमो॑  
गा॒यत्री॑त्रि॒ष्टुप्ज॑गती॒वष॑द्वाहा॒ नमः॑ पृथि॒व्यन्तरि॑क्षम् द्यौर्व॑षद्वाहा  
नमो॑ऽग्नि॒र्वायुः॑ सूर्यो॒ वष॑द्वाहा॒ नमः॑ प्रा॒णो व्या॑नोऽपानो॒ वष॑द्वाहा  
नमो॑ऽन्नं कृषि॒र्वृष्टि॑र्व॒षद्वाहा॑ न॒मः पि॒ता पु॒त्रः पौ॒त्रो वष॑द्वाहा॒ नमो॑  
भूर्भुवः॑ सु॒र्व॒षद्वाहा॑ न॒मः ।

॥ अथ॑र्वशिरसम् ॥

इन्द्रो॑दधी॒चो अ॒स्थभिः॑ । वृ॒त्राण्य॑प्रतिष्कुतः । ज॒घान॑ न॒वती॑र्नव ।  
इ॒च्छन्न॑श्वस्य॒ यच्छिरः॑ । पर्व॑तेष्वप॒श्रित॑म् । तद्वि॑दच्छि॒र्यणा॑वति ।  
अत्रा॑ह॒ गोर॑मन्वत । नाम॒ त्वष्ट॑रपी॒च्यम् । इ॒त्थ च॑न्द्रम॒सो गु॑हे ।  
इन्द्र॑मि॒द्वाथिनो॑ बृ॒हत् । इन्द्र॑म॒र्केभि॑र॒र्किणः॑ । इन्द्रं॑ वा॒नीर॑नूपत ।  
इन्द्र॑ इ॒द्धर्योः॑ सचा॑ । स॒मि॒श्र आ॑वचो युजा॑ । इन्द्रो॑ व॒ञ्जीहि॑रण्ययः ।  
इन्द्रो॑ दी॒र्घाय॑ चक्षसे । आ॒सूर्यं॑ रोहयद्वि॒वि । वि॒गोभि॑र॒द्रिमै॑रयत् ।  
इन्द्र॑ वाजे॒षु नो॑ अव । स॒हस्र॑प्रधनेषु च । उ॒ग्र उ॒ग्राभि॑रू॒तिभिः॑ ।

तमिन्द्रं वाजयामसि । महे वृत्राय हन्तवे । सा वृषा वृषभोऽभुवत् ।  
 इन्द्रः स दामने कृतः । ओजिष्ठः सबलेहितः । द्युम्नी श्लोकी ससौम्यः ।  
 गिरा वज्रो न संभृतः । सबलो अनपच्युतः । ववक्षुरुग्रो अस्तृतः ।  
 ॥ प्रत्यंगिरसम् ॥

चक्षुषो हेते मनसो हेते । वाचोहेते ब्रह्मणो हेते ।  
 योमाऽघायुरभिदासति । तमग्ने मेन्याऽमेनिं कृणु ।  
 यो मा चक्षुषा यो मनस । यो वाचा ब्रह्मणाघायुरभिदासति ।  
 तयाऽग्ने त्वं मेन्या । अमुममेनिं कृणु ।  
 यत्किञ्चासौ मनसा यच्च वाचा । यज्ञैर्जुहोति यजुष हविर्भिः ।  
 तन्मृत्युर्निर्ऋत्या संविदानः । पुरादिष्टादाहुतीरस्य हन्तु ।  
 यातुधाना निर्ऋतिरादु रक्षः । ते अस्यघ्नन्त्वन्तेन सत्यम् ।  
 इन्द्रेषिता आज्यमस्य मध्नन्तु । मा तत्समृद्धिं यदसौ करोति ।  
 हन्मि तेऽहं कृतं हविः । यो मे घोरमचीकृतः ।  
 अपां चोत उभौ बाहू । अपनह्याम्यास्यम् ।  
 अपनह्यामि ते बाहू । अपनह्याम्यास्यम् ।  
 अग्नेर्देवस्य ब्रह्मणा । सर्वं तेऽवधिषंकृतम् ।  
 पुराऽमुष्य वषट्कारात् । यज्ञं देवेषु नस्कृधि ।  
 स्विष्टमस्माकं भ्यूयात् । माऽस्मान् प्रापन्नरातयः ।  
 अन्तिदूरे सतो अग्ने । भ्रातृव्यस्याभिदासतः ।  
 वषट्कारेण वज्रेण । कृत्यां हन्मि कृतामहम् ।  
 यो मा नक्तं दिवा सायम् । प्रातश्चाहो निपीयति ।  
 अद्यातमिन्द्र वज्रेण । भ्रातृव्यं पादयामसि ।  
 प्राणो रक्षति विश्वमेजत् । इर्यो भूत्वा बहुदा बहूनि ।  
 स इत्सर्वं व्यानशे । यो देवो देवेषु विभूरन्तः ।  
 आवृद्दात् क्षेत्रियध्वगद्वेषा । तमित्प्राणं मनसोपशिक्षत ।  
 अग्रं देवानामिदमत्तु नो हविः । मनसश्चित्तेदम् ।  
 भूतं भव्यं च गुप्यते । तद्धिदेवेष्वग्नियम् ।

आ न एतुपुरश्चरम् । सह देवैरिमं हवम् ।  
 मनः श्रेयसि श्रेयसि । कर्मन्यज्ञपतिं दधत् ।  
 जुषतां मे वागिदं हविः । विराड् देवी पुरोहिता ।  
 हव्यवाडनपायिनी । यया रूपाणि बहुदा वदन्ति ।  
 पेशासि देवाः परमे जनित्रे । सा नो विराडनपस्फुरन्ति ।  
 वाग्देवी जुषतामिदं हविः । चक्षुर्देवानां ज्योतिरमृते न्यक्तम् ।  
 अस्य विज्ञानाय बहुधा निर्धीयते । तस्य सुम्रमशीमहि ।  
 मा नो हासीद्विचक्षणम् । आयुरिन्नः प्रतीर्यताम् ।  
 अनन्धाश्चक्षुषावयम् । जीवा ज्योतिरशीमहि ।  
 सुवर्ज्योतिरुतामृतम् । श्रोत्रेण भद्रमुत शृण्वन्ति सत्यम् ।  
 श्रोत्रेण वाचं बहुधोद्यमानाम् । श्रोत्रेण मोदश्च महश्च श्रूयते ।  
 श्रोत्रेण सर्वा दिश आशृणोमि । येन प्राच्या उत दक्षिणा ।  
 प्रतीच्यैदिशः शृण्वन्त्युत्तरात् । तदिच्छ्रोत्रं बहुधोद्यमानम् ।  
 अरान्ननेमिः परिसर्वं बभूव ।  
 सिंहे व्याघ्र उत या पृदाकौ । त्विषिरग्नौ ब्राह्मणे सूर्येया ।  
 इन्द्रं या देवी सुभगा जजान । सा न आगन्वर्चसा संविदाना ।  
 या राजन्ये दुन्दुभावायतायाम् । अश्वस्य ऋद्धेपुरुषस्य मायौ ।  
 इन्द्रं या देवी सुभगा जजान । सा न आगन्वर्चसा संविदाना ।  
 या हस्तिनि द्वीपिनि या हिरण्ये । त्विषिरश्वेषु पुरुषेषु गोषु ।  
 इन्द्रं या देवी सुभगा जजान । सा न आगन्वर्चसा संविदाना ।  
 रथेअक्षेषु वृषभस्य वजे । वाते पर्जन्ये वरुणस्य शुभ्रे ।  
 इन्द्रं या देवी सुभगा जजान । सा न आगन्वर्चसा संविदाना ।  
 राडसि विराडसि । सम्राडसि स्वराडसि ।  
 इन्द्राय त्वा तेजस्वते तेजस्वन्तं श्रीणामि ।  
 इन्द्राय त्वौजस्वत ओजस्वन्तं श्रीणामि ।  
 इन्द्राय त्वा पयस्वते पयस्वन्तं श्रीणामि ।  
 इन्द्राय त्वाऽऽयुष्मत आयुष्मन्तं श्रीणामि ।

तेजोऽसि । तत्ते प्रयच्छामि । तेजस्वदस्तु मे मुखम् ।  
 तेजस्वच्छिरो अस्तु मे । तेजस्वान् विश्वतः प्रत्यङ् ।  
 तेजसा सम्पिपृग्धि मा ।  
 ओजोऽसि । तत्ते प्रयच्छामि । ओजस्वदस्तु मे मुखम् ।  
 ओजस्वच्छिरो अस्तु मे । ओजस्वान् विश्वतः प्रत्यङ् ।  
 ओजसा सम्पिपृग्धि मा ।  
 पयोऽसि । तत्ते प्रयच्छामि । पयस्वदस्तु मे मुखम् ।  
 पयस्वच्छिरो अस्तु मे । पयस्वान् विश्वतः प्रत्यङ् ।  
 पयसा सम्पिपृग्धि मा ।  
 आयुरसि । तत्ते प्रयच्छामि । आयुष्मदस्तु मे मुखम् ।  
 आयुष्मच्छिरो अस्तु मे । आयुष्मान् विश्वतः प्रत्यङ् ।  
 आयुषा सम्पिपृग्धि मा ।  
 इममग्न आयुषे वर्चसे कृधि । प्रियं॑ रेतो वरुण सोम राजन् ।  
 मातेवास्मा अदिते शर्म यच्छ । विश्वेदेवा जरदष्टिर्यथाऽसत् ।  
 आयुरसि विश्वायुरसि । सर्वायुरसि सर्वमायुरसि ।  
 यतो वातो मनोजवाः । यतः क्षरन्ति सिन्धवः ।  
 तासान्त्वा सर्वासा॑ रुचा । अभिषिचामि वर्चसा ।  
 समुद्र इवासि गह्वना । सोम इवास्यदाभ्यः ।  
 अग्निरिव विश्वतः प्रत्यङ् । सूर्य इव ज्योतिषा विभूः ।  
 अपां यो द्रवणे रसः । तमहमस्मा आमुष्यायणाय ।  
 तेजसे ब्रह्मवर्चसाय गृह्णामि ।  
 अपां यो ऊर्मौ रसः । तमहमस्मा आमुष्यायणाय ।  
 ओजसे वीर्याय गृह्णामि ।  
 अपां यो मध्यतो रसः । तमहमस्मा आमुष्यायणाय ।  
 पुष्टै प्रजननाय गृह्णामि ।  
 अपां यो यज्ञियो रसः । तमहमस्मा आमुष्यायणाय ।  
 आयुषे दीर्घायुत्वाय गृह्णामि ।

अहमस्मि प्रथमजा ऋतस्य । पूर्वं देवेभ्यो अमृतस्य नाभिः ।  
 यो मा ददाति स इदेव मा वाः । अहमन्नमन्नमदन्तमग्नि ।  
 पूर्वमग्नेरपि दहत्यन्नं । यत्तो हासाते अहमुत्तरेषु ।  
 व्यात्तमस्य पशवस्सुजम्भम् । पश्यन्ति धीरा प्रचरन्ति पाकाः ।  
 जहाम्यन्यन्नजहाम्यन्यम् । अहमन्नं वशमिच्चरामि ।  
 समानमर्थं पर्येमि भुञ्जत् । को मामन्नं मनुष्यो दयेत ।  
 पराके अन्नं निहितं लोक एतत् । विश्वेर्देवैः पितृभिर्गुप्तमन्नम् ।  
 यदद्यते लुप्यते यत्परोप्यते । शततमी सा तनूमे बभूव ।  
 महान्तो चरू सकृद्गुधेन पप्रौ । दिवंच पृश्नि पृथिवीं च साकम् ।  
 तत्सम्पिबन्तो न मिनन्ति वेधसः । नैतद्भूयो भवति नो कनीयः ।  
 अन्नं प्राणमन्नमपानमाहुः । अन्नं मृत्युं तमु जीवातुमाहुः ।  
 अन्नं ब्रह्माणो जरसं वदन्ति । अन्नमाहुः प्रजननं प्रजानाम् ।  
 मोघमन्नं विन्दते अप्रचेताः । सत्यं ब्रवीमि वध इत्स तस्य ।  
 नार्यमणं पुष्यति नो सखायम् । केवलाघो भवति केवलादि ।  
 अहं मेघस्तनयन्वर्षन्नस्मि । मामदन्त्यहमद्यन्यान् ।  
 अहं सदमृतो भवामि । मदादित्या अधि सर्वे तपन्ति ।  
 देवीं वाचमजनयन्त देवाः । तां विश्वरूपाः पशवो वदन्ति ।  
 सा नो मन्द्रेषमूर्जं दुहाना । धेनुर्वागस्मानुपसुष्टुतैतु ।  
 यद्वाग्वदन्त्यविचेतनानि । राश्री देवानान्निषसादमन्द्रा ।  
 चतस्र ऊर्जदुदुहे पया सिक्स्विदस्याः परमं जगाम ।  
 अनन्तामन्तादधि निर्मितां महीम् । यस्यां देवा अदधुर्भोजनानि ।  
 एकाक्षरमां द्विपदा षत्पदाश्च । वाचं देवा उपजीवन्ति विश्वे ।  
 वाचं देवा उपजीवन्ति विश्वे । वाचं गन्धर्वाः पशवो मनुष्याः ।  
 वाचीमाविश्वा भुवनान्यर्पिता । सा नो हवं जुषतामिन्द्रपत्नी ।  
 वागक्षरं प्रथमजा ऋतस्य । वेदानां माताऽमृतस्य नाभिः ।  
 सानो जुषाणोप यज्ञमागात् । अवन्ती देवी सुहवामे अस्तु ।  
 यामृषयो मन्त्रकृतो मनीषिणः । अन्वैच्छन्देवास्तपसा श्रमेण ।

तां देवीं वाचं हविषा यजामहे । सा नो दधातु सुकृतस्य लोके ।  
 चत्वारि वाक्परिमिता पदानि । तानि विदुर्ब्राह्मणा ये मनीषिणः ।  
 गुहा त्रीणि निहिता नेंगयन्ति । तुरीयं वाचो मनुष्या वदन्ति ।  
 श्रद्धयाग्निः समिध्यते । श्रद्धया विन्दते हविः ।  
 श्रद्धां भगस्य मूर्धनि वचया वेदयामसि ।  
 प्रियं श्रद्धे ददतः । प्रियं श्रद्धे दिदासतः ।  
 प्रियं भोजेषु यज्वसु । इदं म उदितं कृधि ।  
 यथा देवा असुरेषु । श्रद्धामुग्रेषु चक्रिरे ।  
 एवं भोजेषु यज्वसु । अस्माकमुदितं कृधि ।  
 श्रद्धं देवा यजमानाः । वायुगोपा उपासते ।  
 श्रद्धां हृदय्ययाऽऽकृत्या । श्रद्धया हूयते हविः ।  
 श्रद्धां प्रातर्हवामहे । श्रद्धां मध्यंदिनं परि ।  
 श्रद्धां सूर्यस्य निमृचि । श्रद्धे श्रद्धापयेह मां ।  
 श्रद्धा देवानधिवस्ते । श्रद्ध विश्वमिदं जगत् ।  
 श्रद्धां कामस्य मातरम् । हविष वर्धयामसि ।  
 ब्रह्मजज्ञानं प्रथमं पुरस्तात् । विसीमतस्सुरुचो वेन आवः ।  
 स बुध्निया उपमा अस्य विष्ठाः । सतश्च योनिमसतश्च विवः ।  
 पिता विराजामृषभो रयीणाम् । अन्तरिक्षं विश्वरूप आविवेश ।  
 तमर्कैरभ्यर्चन्ति वत्सम् । ब्रह्म सन्तं ब्रह्मणा वर्धयन्तः ।  
 ब्रह्म देवानजनयत् । ब्रह्म विश्वमिदं जगत् ।  
 ब्रह्मणः क्षत्रनिर्मितम् । ब्रह्म ब्राह्मण आत्मना ।  
 अन्तरस्मिन्नेमे लोकाः । अन्तर्विश्वमिदं जगत् ।  
 ब्रह्मैव भूतानां ज्येष्ठम् । तेन कोऽर्हति स्पर्धितुम् ।  
 ब्रह्मन्देवास्त्रयस्त्रिंशत् । ब्रह्मन्निन्द्रप्रजापती ।  
 ब्रह्मन् ह विश्वा भूतानि । नावीवान्तः समाहिता ।  
 चतस्र आशाः प्रचरन्त्वग्नेयः । इमं नो यज्ञं नयतु प्रजान् ।  
 घृतं पिन्वन्नजरं सुवीरम् । ब्रह्मसमिद्धवत्याहुतीनाम् ।

आगावो अगमन्नुत भद्रमक्रन् । सीदन्तु गोष्ठेरणयन्त्वस्मे ।  
 प्रजावतीः पुरुरूपा इह स्युः । इन्द्राय पूर्वीरुपसो दुहानाः ।  
 इन्द्रो यज्वने पृणते चशिक्षति । उपहृदाति न स्वं मुषायति ।  
 भूयो भूयो रयिमिदस्य वर्धयन् । अभिन्ने खिल्ले निदधाति देवयुम् ।  
 न ता नशन्ति न दभाति तस्करः । नैना अमित्रो व्यथिरदधर्षति ।  
 देवाश्च याभिर्यजते ददाति च । ज्योगित्ताभिस्सचते गोपतिः सह ।  
 न ता अवा रेणुक कातो अश्रुते । न सः स्कृतत्रपुपयन्ति ता अभि ।  
 उरुगायमभयन्तस्य ता अनु । गावो मर्त्यस्य विचिरन्ति यज्वनः ।  
 गावो भगो गाव इन्द्रो मे अच्छात् । गावः सोमस्य प्रथमस्य भक्षः ।  
 इमा यागावस्सजना स इन्द्रः । इच्छामीद्धुदा मनसा चिदिन्द्रम् ।  
 यूयं गावो मेदयथा कृशंचित् । अश्लीलं चित्कृणुथा सुप्रतीकम् ।  
 भद्रं गृहं कृणुथ भद्रवाचः । बृहद्वो वय उच्यते सभासु ।  
 प्रजावतीः सूयवसश्च रिशन्तीः । शुद्धा अपस्सु प्रपाणे पिबन्तीः ।  
 मावस्तेन इशत माघशसः । परिवोहेती रुद्रस्य वृज्यात् ।  
 उपेदमुपपर्वनम् । आसु गोषूप पृच्यताम् ।  
 उपषभस्य रेतासि । उपेन्द्र तव वीर्ये ।  
 ता सूर्याचन्द्रमसा विश्वभृत्तमामहत् ।  
 तेजो वसु मद्राजतो दिवि । सामात्मानाचरतस्साम चारिणा ।  
 ययोर्ब्रतन्नममे जातुदेवयोः । उभावन्तौ परियात अम्या ।  
 दिवो नरश्मीश्च स्तनुतोव्यर्णवे । उभा भुवन्तीभुवना कविक्रतू ।  
 सूर्या न चन्द्रा चरतो हतामती । पतीद्युमद्विश्वविदा उभा दिवः ।  
 सूर्या उभा चन्द्रमसा विचक्षणा । विश्ववारा वरिवो भावरेण्या ।  
 ता नोऽवतं मतिमन्ता महिब्रता । विश्व वपरे प्रतरणा तरन्ता ।  
 सुवर्विदा दृशये भूरि रश्मी । सूर्या हि चन्द्रा वसुत्वेष दर्शता ।  
 मनस्विनो भाऽनुचरतोनुसंदिवम् । अस्य श्रवो नद्यः सप्त बिभ्रति ।  
 द्यावाक्षामा पृथिवी दर्शतं वपुः । अस्मे सूर्या चन्द्रमसाऽभिचक्षे ।  
 श्रद्धेकमिन्द्र चरतो विचर्तुरम् । पुर्वापरंचरतोमाययैतौ ।

शिशुः क्रीडन्तौ परियातो अध्वरम् । विश्वान्यन्यो भुवनाऽभिचष्टे ।  
 ऋतूनन्यो विदधञ्जायते पुनः ।  
 हिरण्यवर्णाः शुचयः पावका यासु जातः कश्यपो यास्विन्द्रः ।  
 अग्निं या गर्भम् दधिरे विरूपास्तान् आपश्शꣳ स्योना भवन्तु ॥  
 यासाꣳ राजा वरुणो याति मध्ये सत्यानुते अवपश्यम् जनानाम् ।  
 मधुश्चुतश्शुचयो याः पावकास्ता न आपश्शꣳ स्योना भवन्तु ॥  
 यासाम् देवा दिवि कृण्वन्ति भक्षं या अन्तरिक्षे बहुधा भवन्ति ।  
 याः पृथिवीम् पयसोन्दन्ति शुक्रास्ता न आपश्शꣳ स्योना भवन्तु ॥  
 शिवेन मा चक्षुषा पश्यतापश्शिवया तनुवोप स्पृशत त्वचम् मे ।  
 सर्वाꣳ अग्नीꣳ रप्सुषदो हुवे वो मयि वर्चो बलमोजो निधत्त ॥  
 आपोभद्रा गुतमिदाप आसुरग्नीषोमौ बिभ्रात्याप इत्ताः ।  
 तीव्रो रसो मधुपृचामरंगम आ मा प्राणेन सह वर्च सागन् ॥  
 आदित्पश्याम्युत वा शृणोम्यामा घोषो गच्छति वाङ् न आसाम् ।  
 मन्येभेजानो अमृतस्य तर्हि हिरण्यवर्णा अतृपं यदावः ॥  
 नासदासीन्नो सदासीत्तदानीम् । नासीद्रजो नो व्योमा परो यत् ।  
 किमावरिवः कुह कस्य शर्मन् । अम्भः किमासीद्गहनं गभीरम् ।  
 न मृत्युरमृतं तर्हि न । रात्रिया अह आसीत् प्रकेतः ।  
 आनीदवातꣳ स्वधया तदेकम् । तस्माद्धान्यं न परः किंचनास ।  
 तम आसीत्तमसा गूढमग्रे प्रकेतम् । सलिलꣳ सर्वं मा इदम् ।  
 तुच्छेनाभ्वपि हितं यदासीत् । तमसस्तन्महिना जायतैकम् ।  
 कामस्तदग्रे समवर्तताधि । मनसो रेतः प्रथमं यदासीत् ।  
 स तो बन्धुमसति निरविन्दन् । हृदिप्रतीप्या कवयो मनीषा ।  
 तिरश्चीनो विततो रश्मिरेषाम् । अधस्विदासी ३ दुपरिस्विदासी ३ त् ।  
 रेतोधा आसन्महिमा न आसन् । स्वधा अवस्तात् प्रयतिः परस्तात् ।  
 को अद्धा वेद क इह प्रवाचत् । कुत आ जाता कुत इयं विसृष्टिः ।  
 अर्वाग्देवा अस्य विसर्जनाय । अथा को वेदयत आ बभूव ।

इयं विसृष्टिर्यत आबभूव । यदि वा दधे यदि वा न ।  
 यो अस्याध्यक्षः परमे व्योमन् । सो अंग वेद यदि वा न वेद ।  
 किं स्विद्वनं क उ स वृक्ष आसीत् । यतो द्यावापृथिवी निष्टतक्षुः ।  
 मनीषिणो मनसापुच्छते दुतत् । यदध्यतिष्टद्भुवनानि धारयन् ।  
 ब्रह्म वनं ब्रह्म सवृक्ष आसीत् । यतो द्यावापृथिवी निष्टतक्षुः ।  
 मनीषिणो मनसा विब्रवीमि वः । ब्रह्माध्यतिष्टद्भुवनानि धारयन् ।  
 प्रातरग्निं प्रातरिन्द्रं हवामहे । प्रातर्मित्रावरुणा प्रातरश्विना ।  
 प्रातर्भगं पूषणं ब्रह्मणस्पतिम् । प्रातः सोममुत रुद्रं हुवेम ।  
 प्रातर्जितं भगमुग्रं हुवेम । वयं पुत्रमदितेर्यो विधर्ता ।  
 आघ्रश्चिद्यं मन्यमानस्तुरश्वित् । राजाचिद्यं भगं भक्षीत्याह ।  
 भग प्रणेतर्भग सत्यराधः । भगेमां धियमुदवददन्नः ।  
 भग प्रणो जनय गोभिरश्वैः । भग प्रनुभिर्नुवन्तः स्याम ।  
 उतेदानीं भगवन्तः स्याम । उत प्रपित्व उत मध्य अह्नाम् ।  
 उतोदिता मघवन्त्सूर्यस्य । वयं देवानां सुमतौ स्याम ।  
 भग एव भगवा अस्तु देवाः । तेन वयं भगवन्तः स्याम ।  
 तन्त्वा भग सर्व इज्जोहवीमि । सनो भग पुर एता भवेह ।  
 समध्वरायोषसोनमन्त । दधिक्रावेव शुचये पदाय ।  
 अर्वाचीनं वसुविदं भगन्नः । रथमिवाश्वा वाजिन आवहन्तु ।  
 अश्ववतीर्गोमतीर्न उषासः । वीरवतीः सदमुच्छन्तु भद्राः ।  
 घृतं दुहाना विश्वतः प्रपीनाः । यूयं पात स्वस्तिभिः सदा नः ।  
 अग्निर्नः पातु कृत्तिकाः । नक्षत्रं देवमिन्द्रियम् ।  
 इदमासां विचक्षणम् । हविरासं जुहोतन ।  
 यस्य भान्ति रश्मयो यस्य केतवः । यस्येमा विश्वा भुवनानि सर्वा ।  
 स कृत्तिकाभिरभिसंवसानः । अग्निर्नो देवस्सुविते दधातु ॥  
 प्रजापते रोहिणीवेतु पत्नी । विश्वरूपा बृहती चित्रभानुः ।  
 सा नो यज्ञस्य सुविते दधातु । यथा जीवेम शरदस्सवीराः ।  
 रोहिणी देव्युदगात्पुरस्तात् । विश्वा रूपणि प्रतिमोदमाना ।

प्रजापतिं हविषा वर्धयन्ती । प्रिया देवानामुपयातु यज्ञम् ॥  
 सोमो राजा मृगशीरुषेण आगन् । शिवं नक्षत्रं प्रियमस्य धाम ।  
 आप्यायमानो बहुधा जनेषु । रेतः प्रजां यजमाने दधातु ।  
 यत्ते नक्षत्रं मृगशीरुषमस्ति । प्रियं राजन् प्रियतमं प्रियाणाम् ।  
 तस्मै ते सोम हविषा विधेम । शन्न एधि द्विपदे शं चतुष्पदे ॥  
 आर्द्रया रुद्रः प्रथमा न एति । श्रेष्ठो देवानां पतिरघ्नियानाम् ।  
 नक्षत्रमस्य हविषा विधेम । मा नः प्रजा रीरिषन्मोत वीरान् ।  
 हेति रुद्रस्य परिणो वृणक्तु । आर्द्रा नक्षत्रं जुषता हविर्नः ।  
 प्रमुञ्चमानौ दुरितानि विश्वा । अपाघशं सन्नुदतामरातिम् ॥  
 पुनर्नो देव्यदितिस्पृणोतु । पुनर्वसूनः पुनरेतां यज्ञम् ।  
 पुनर्नो देवा अभियन्तु सर्वे । पुनः पुनर्वो हविषा यजामः ।  
 एवा न देव्यदितिरनर्वा । विश्वस्य भर्त्री जगतः प्रतिष्ठा ।  
 पुनर्वसू हविषा वर्धयन्ती । प्रियम् देवानामप्येतु पाथः ॥  
 बृहस्पतिः प्रथमं जायमानः । तिष्यम् नक्षत्रमभि संबभूव ।  
 श्रेष्ठो देवानां पृतनासुजिष्णुः । दिशोऽनु सर्वा अभयन्नो अस्तु ।  
 तिष्यः पुरस्तादुत मध्यतो नः । बृहस्पतिर्नः परिपातु पश्चात् ।  
 बाधेतान्द्वेषो अभयं कृणुताम् । सुवीर्यस्य पतयस्याम ॥  
 इदं सर्पेभ्यो हविरस्तु जुष्टम् । आश्रेषा येषामनुयन्ति चेतः ।  
 ये अन्तरिक्षं पृथिवीं क्षियन्ति । ते नस्सर्पासो हवमागमिष्ठाः ।  
 ये रोचने सूर्यस्यापि सर्पाः । ये दिवं देवीमनुसञ्चरन्ति ।  
 येषामश्रेषा अनुयन्ति कामम् । तेभ्यस्सर्पेभ्यो मधुमञ्जुहोमि ॥  
 उपहृताः पितरो ये मघासु । मनोजवसस्सुकृतस्सुकृत्याः ।  
 ते नो नक्षत्रे हवमागमिष्ठाः । स्वधाबिर्यज्ञं प्रयतं जुषन्ताम् ।  
 ये अग्निदग्धा येऽनग्निदग्धाः । येऽमुल्लोकं पितरः क्षियन्ति ।  
 यांश्च विद्मया उ च न प्रविद्म । मघासु यज्ञं सुकृतम् जुषन्ताम् ॥  
 गवां पतिः फल्गुनीनामसि त्वम् । तदर्यमन् वरुणमित्र चारु ।

तं त्वा वयं सनितारं सनीनाम् । जीवा जीवन्तमुप संविशेम ।  
येनेमा विश्वा भुवनानि सञ्जिता । यस्य देवा अनुसंयन्ति चेतः ।  
अर्यमा राजाऽजरस्तु विष्मान् । फल्गुनीनामृषभो रोरवीति ॥  
श्रेष्ठो देवानाम् भगवो भगासि । तत्त्वा विधुः फल्गुनीस्तस्य वित्तात् ।  
अस्मभ्यं क्षत्रमजरं सुवीर्यम् । गोमदश्वदुपसन्नुदेह ।  
भगोह दाता भग इत्प्रदाता । भगो देवीः फल्गुनीराविवेश ।  
भगस्येत्तं प्रसवं गमेम । यत्र देवैस्सधमादं मदेम ॥  
आयातु देवस्सवितोपयातु । हिरण्ययेन सुवृता रथेन ।  
वहन् हस्तं सुभं विद्वानापसम् । प्रयच्छन्तं पपुरिं पुण्यमच्छं ।  
हस्तः प्रयच्छं त्वमृतं वसीयः । दक्षिणेन प्रतिगृष्णीम एनत् ।  
दातारमद्य सविता विदेय । यो नो हस्ताय प्रसुवाति यज्ञम् ॥  
त्वष्टा नक्षत्रमभ्येति चित्राम् । सुभं ससंयुवति रोचमानाम् ।  
निवेशयन्नमृतान्मर्त्यांश्च । रूपाणि पिंशन् भुवनानि विश्वा ।  
तन्नस्त्वष्टा तदु चित्रा विचष्टाम् । तन्नक्षत्रं भूरिदा अस्तु मह्यम् ।  
तन्नः प्रजां वीरवतीं सनोतु । गोभिर्नो अश्वैस्समनक्तु यज्ञम् ॥  
वायुर्नक्षत्रमभ्येति निष्प्राम् । तिग्मशृंगो वृषभो रोरुवाणः ।  
समीरयन् भुवना मातरिश्वा । अप द्वेषांसि नुदतामरातीः ।  
तन्नो वायस्तदु निष्प्रा शृणोतु । तन्नक्षत्रं भूरिदा अस्तु मह्यम् ।  
तन्नो देवासो अनुजानन्तु कामम् । यथा तरेम दुरितानि विश्वा ॥  
दूरमस्मच्छत्रवो यन्तु भीताः । तदिन्द्राग्नी कृणुताम् तद्विशाखे ।  
तन्नो देवा अनुमदन्तु यज्ञम् । पश्चात् पुरस्तादभयन्नो अस्तु ।  
नक्षत्राणामधिपत्नी विशाखे । श्रेष्ठाविन्द्राग्नी भुवनस्य गोपौ ।  
विषूचश्शत्रूनपबाधमानौ । अपक्षुधन्नुदतामरातिम् ॥  
पूर्णा पश्चादुत पूर्णा पुरस्तात् । उन्मध्यतः पौर्णमासी जिगाय ।  
तस्यां देवा अधिसंवसन्तः । उत्तमे नाक इह मादयन्ताम् ।  
पृथ्वी सुवर्चा युवतिः सजोषाः । पौर्णमास्युदगाच्छोभमाना ।

आप्याययन्ती दुरितानि विश्वा । उरुं दुहां यजमानाय यज्ञम् ।  
 ऋद्ध्यास्म हव्यैर्नमसोपसद्य । मित्रं देवं मित्रधेयं नो अस्तु ।  
 अनूराधान् हविषा वर्धयन्तः । शतं जीवेम शरदः सर्वाः ।  
 चित्रम् नक्षत्रमुदगात्पुरस्तात् । अनूराधा स इति यद्वदन्ति ।  
 तन्मित्र एति पथिभिर्देवयानैः । हिरण्ययैर्वितैरन्तरिक्षे ॥  
 इन्द्रो ज्येष्ठामनु नक्षत्रमेति । यस्मिन् वृत्रं वृत्र तूयो ततार ।  
 तस्मिन्वयममृतं दुहानाः । क्षुधन्तरेम दुरितिं दुरिष्टिम् ।  
 पुरन्दराय वृषभाय धृष्णवे । अषाढाय सहमानाय मीढुषे ।  
 इन्द्राय ज्येष्ठा मधुमद्दुहानाः । उरुं कृणोतु यजमानाय लोकम् ॥।  
 मूलं प्रजां वीरवतीं विदेय । पराच्येतु निर्ऋतिः पराचा ।  
 गोभिर्नक्षत्रं पशुभिस्समक्तम् । अहर्भूयाद्यजमानाय मह्यम् ।  
 अहर्नो अद्य सुविते ददातु । मूलं नक्षत्रमिति यद्वदन्ति ।  
 पराचीं वाचा निर्ऋतिं नुदामि । शिवं प्रजये शिवमस्तु मह्यम् ॥  
 या दिव्या आपः पयसा सम्बभूवुः । या अन्तरिक्ष उत पार्थिवीर्याः ।  
 यासामषाढा अनुयन्ति कामम् । ता न आपः शꣳ स्योना भवन्तु ।  
 याश्च कूप्या याश्च नाद्यास्समुद्रियाः । याश्च वैशन्तीरुत प्रासचीर्याः ।  
 यासामषाढा मधु भक्षयन्ति । ता न आपः शꣳ स्योना भवन्तु ॥  
 तन्नो विश्वे उप शृण्वन्तु देवाः । तदषाढा अभिसंयन्तु यज्ञम् ।  
 तन्नक्षत्रं प्रथतां पशुभ्यः । कृषिर्वृष्टिर्यजमानाय कल्पताम् ।  
 शुभ्राः कन्या युवतयस्सुपेशसः । कर्मकृतस्सुकृतो वीर्यावतीः ।  
 विश्वान् देवान् हविषा वर्धयन्तीः । अषाढाः काममुपायन्तु यज्ञम् ॥  
 यस्मिन् ब्रह्माऽभ्यजयत्सर्वमेतत् । अमुञ्च लोकमिदमूच सर्वम् ।  
 तन्नो नक्षत्रमभिजिद्विजित्य । श्रियं दधात्वहणीयमानम् ।  
 उभौ लोकौ ब्रह्मणा सञ्जितेमौ । तन्नो नक्षत्रमभिजिद्विचष्टाम् ।  
 तस्मिन्वयं पृतनास्सञ्जयेम । तन्नो देवासो अनुजानन्तु कामम् ॥  
 शृण्वन्ति श्रोणाममृतस्य गोपाम् । पुण्यामस्या उपशृणोमि वाचम् ॥

महीं देवीं विष्णुपत्नीमजूर्याम् । प्रतीची मेना हविषा यजामः ।  
 त्रेधा विष्णुरुगायो विचक्रमे । महीं दिवं पृथिवीमन्तरिक्षम् ।  
 तच्छ्रोणैतिश्रव इच्छमाना । पुण्यं श्लोकं यजमानाय कृण्वती ॥  
 अष्टौ देवा वसवस्सोम्यासः । चतस्रो देवीरजराः श्रविष्ठाः ।  
 ते यज्ञं पान्तु रजसः पुरस्तात् । संवत्सरीणममृतं स्वस्ति ।  
 यज्ञं नः पान्तु वसवः पुरस्तात् । दक्षिणतोऽभियन्तु श्रविष्ठाः ।  
 पुण्यन्नक्षत्रमभि संविशाम । मा नो अरातिरघशं साऽगन् ॥  
 क्षत्रस्य राजा वरुणोऽधिराजः । नक्षत्राणां शतभिषग्वसिष्ठः ।  
 तौ देवेभ्यः कृणुति दीर्घमायुः । शतं सहस्रा भेषजानि धत्तः ।  
 यज्ञन्नो राजा वरुण उपयातु । तन्नो विश्वे अभि संयन्तु देवाः ।  
 तन्नो नक्षत्रं शतभिषग्जुषाणम् । दीर्घमायुः प्रतिरद्वेषजानि ॥  
 अज एकपादुदगात्पुरस्तात् । विश्वा भूतानि प्रति मोदमानः ।  
 तस्य देवाः प्रसवं यन्ति सर्वे । प्रोष्ठपदासो अमृतस्य गोपाः ।  
 विश्राजमानस्समिधा न उग्रः । आऽन्तरिक्षमरुहदगन्द्याम् ।  
 तं सूर्यं देवमजमेकपादम् । प्रोष्ठपदासो अनुयन्ति सर्वे ॥  
 अहिर्बुध्नियः प्रथमा न एति । श्रेष्ठो देवानामुत मानुषाणाम् ।  
 तं ब्राह्मणास्सोमपास्सोम्यासः । प्रोष्ठपदासो अभिरक्षन्ति सर्वे ।  
 चत्वार एकमभि कर्म देवाः । प्रोष्ठपदा स इति यान् वदन्ति ।  
 ते बुध्नियं परिषद्यं स्तुवन्तः । अहिरक्षन्ति नमसोपसद्यं ॥  
 पूषा रेवत्यन्वेति पन्थाम् । पुष्टिपती पशुपा वाजबस्त्यौ ।  
 इमानि हव्या प्रयता जुषाणा । सुगैर्नो यानैरुपयातां यज्ञम् ।  
 क्षुद्रान् पशून् रक्षतु रेवती नः । गावो नो अश्वा अन्वेतु पूषा ।  
 अन्नं रक्षन्तो बहुदा विरूपम् । वाजं सनुतां यजमानाय यज्ञम् ॥  
 तदश्विनावश्वयुजोपयाताम् । शुभङ्गमिष्ठौ सुयमेभिरश्वैः ।  
 स्वं नक्षत्रं हविषा यजन्तौ । मध्वासम्पृत्तौ यजुषा समत्तौ ।  
 यौ देवानां भिषजौ हव्यवाहौ । विश्वस्य दूतवमृतस्य गोपौ ।

तौ नक्षत्रं जुजुषाणोपयाताम् । नमोऽश्विभ्यां कृणुमोऽश्वयुग्भ्याम् ॥  
 अप पाप्मानं भरणीर्भरन्तु । तद्यमो राजा भगवान् विचष्टाम् ।  
 लोकस्य राजा महतो महान् हि । सुगं नः पन्थामभयं कृणोतु ।  
 यस्मिन्नक्षत्रे यम एति राजा । यस्मिन्नेनमभ्यषिचन्त देवाः ।  
 तदस्य चित्रं हविषा यजाम । अप पाप्मानं भरणीर्भरन्तु ॥  
 निवेशनी सङ्गमनी वसूनां विश्वा रूपाणि वसून्यावेशयन्ती ।  
 सहस्रपोषं सुभगा रराणा सा न आगन्वर्चसा संविदाना ॥  
 यत्ते देवा अदधुर्भागधेयममावास्ये संवसन्तो महित्वा ।  
 सा नो यज्ञं पिपृहि विश्ववारे रयिन्नो धेहि सुभगे सुवीरम् ॥  
 नवो नवो भवति जायमानोऽह्नां केतुरुषसामेत्यग्रे ।  
 भागं देवभ्यो विदधात्यायन् प्रचन्द्रमास्तिरिति दीर्घमायुः ॥  
 यमादित्या अं शुमाप्याययन्ति यमक्षितमक्षितयः पिबन्ति ।  
 तेन नो राजा वरुणो बृहस्पतिराप्याययन्तु भुवनस्य गोपाः ॥  
 ये विरूपे समनसा संव्ययन्ती । समानं तन्तु परितातनाते ।  
 विभू प्रभू अनुभू विश्वतो हुवे । ते नो नक्षत्रे हवमगमेतम् ।  
 वयं देवी ब्रह्मणा संविदानाः । सुरत्वासो देववीतिं दधानाः ।  
 अहोरात्रे हविषा वर्धयन्तः । अति पाप्मानमतिमुत्तद्यागमेम ।  
 प्रत्युवदृश्यायती । व्युच्छन्ती दुहिता दिवः ।  
 अपो मही वृणुते चक्षुषा । तमो ज्योतिष्कृणोति सूनरी ।  
 उदुम्नियास्सचते सूर्यः । स चा उद्यन्नक्षत्रमर्चिमत् ।  
 तवदुषो व्युषि सूर्यस्य च । संभक्तेन गमेमहि ।  
 तन्नो नक्षत्रमर्चिमत् । भानुमत्तेज उच्चरत् ।  
 उपयज्ञमिहागमत् ।  
 प्रनक्षत्राय देवाय । इन्द्रायेन्दुं हवामहे ।  
 स नः सविता सुवत्सनिम् । पुष्टिदां वीरवत्तमम् ।  
 उदुत्यं जातवेदसं देवं वहन्ति केतवः । दृशे विश्वाय सूर्यम् ।

चित्रं देवानामुदगादनीकं चक्षुर्मित्रस्य वरुणस्याग्नेः ।  
 आऽप्राद्यावा पृथिवी अन्तरिक्षं सूर्य आत्मा जगतस्तस्थुषश्च ।  
 आदितिर्न उरुष्यत्वदितिः शर्म यच्छतु । अदितिः पात्व हंसः ।  
 महीमूषु मातर सुव्रतानामृतस्य पत्नीमवसे हुवेम ।  
 तुविक्षत्रामजरन्तीमुरूची सुशर्माणमदिति सुप्रणीतम् ।  
 इदं विष्णुर्विचक्रमे त्रेधा निदधे पदम् । समूढमस्य पा सुरे ।  
 प्रतद्विष्णुस्तवते वीर्याय । मृगो न भीमः कुचरो गिरिष्ठाः ।  
 यस्योरुषु त्रिषु विक्रमणेषु । अधिक्षियन्ति भुवनानि विश्वा ।  
 अग्निर्मूर्धा दिवः ककुत्पतिः पृथिव्या अयम् । अपा रेतासि जिन्वति ।  
 भुवो यज्ञस्य रजसश्च नेता यत्रानियुद्धिः सचसे शिवाभिः ।  
 दिवि मूर्धानं दधिषे सुवषां जिह्वामग्ने चकृषे हव्यवाहम् ।  
 अनुनोऽद्यानुमतिर्यज्ञं देवेषु मन्यताम् ।  
 अग्निश्च हव्यवाहनो भवतां दाशुषे मयः ।  
 अन्विदनुमते त्वं मन्यासै शंच कृधि ।  
 ऋत्वे दक्षाय नोहि नु प्रण आयूषि तारिषः ।  
 हव्यवाहमभिमातिषाहम् । रक्षोहणं पृतनासु जिष्णुम् ।  
 ज्योतिष्मन्तं दीद्यतं पुरन्धिम् । अग्निं स्विष्टकृत माहुवेम ।  
 स्विष्टमग्ने अभितत्पृणाहि । विश्वा देव पृतना अभिष्य ।  
 उरुन्नः पन्थां प्रदिशन्विभाहि । ज्योतिष्मद्धेह्यजरन्न आयुः ॥  
 अग्रये स्वाहा कृत्तिकाभ्यः स्वाहा ।  
 अम्बायै स्वाहा दुलायै स्वाहा ।  
 नितन्त्यै स्वाहाऽभ्रयन्तै स्वाहा ।  
 मेघयन्त्यै स्वाहा वर्षयन्त्यै स्वाहा ।  
 चुपुणीकायै स्वाहा ।  
 प्रजापतये स्वाहा रोहिण्यै स्वाहा ।  
 रोचमानायै स्वाहा प्रजाभ्यः स्वाहा ।  
 सोमाय स्वाहा मृगशीर्षाय स्वाहा ।

इ॒न्व॒का॒भ्यः॒ स्वा॒हौ॒ष॒धी॒भ्यः॒ स्वा॒हा॑ ।  
 रा॒ज्या॒य॒ स्वा॒हा॒ऽभि॒जि॒त्यै॒ स्वा॒हा॑ ।  
 रु॒द्राय॒ स्वा॒हा॒ऽऽर्द्रा॒यै॒ स्वा॒हा॑ ।  
 पि॒न्व॒मा॒ना॒यै॒ स्वा॒हा॒ प॒शु॒भ्यः॒ स्वा॒हा॑ ।  
 अ॒दि॒त्यै॒ स्वा॒हा॒ पु॒न॒र्व॒सु॒भ्याम् ।  
 स्वा॒हा॒ भू॒त्यै॒ स्वा॒हा॒ प्र॒जा॒त्यै॒ स्वा॒हा॑ ।  
 बृ॒ह॒स्प॒तये॒ स्वा॒हा॒ ति॒ष्या॒य॒ स्वा॒हा॑ ।  
 ब्र॒ह्म॒व॒र्च॒साय॒ स्वा॒हा॑ ।  
 सर्पे॒भ्यः॒ स्वा॒हा॒ऽऽश्रे॒षा॒भ्यः॒ स्वा॒हा॑ ।  
 द॒न्त॒शू॒के॒भ्यः॒ स्वा॒हा॑ ।  
 पि॒तृ॒भ्यः॒ स्वा॒हा॒ म॒घा॒भ्यः॒ ।  
 स्वा॒हा॒ऽन॒घा॒भ्यः॒ स्वा॒हा॒ऽग॒दा॒भ्यः॒ ।  
 स्वा॒हा॒ऽरु॒न्ध॒ती॒भ्यः॒ स्वा॒हा॑ ।  
 अ॒र्य॒म्णे॒ स्वा॒हा॒ फ॒ल्गु॒नी॒भ्या॒ स्वा॒हा॑ ।  
 प॒शु॒भ्यः॒ स्वा॒हा॑ ।  
 भ॒गाय॒ स्वा॒हा॒ फ॒ल्गु॒नी॒भ्या॒ स्वा॒हा॑ ।  
 श्रे॒ष्ठा॒याय॒ स्वा॒हा॑ ।  
 स॒वि॒त्रे॒स्वा॒हा॒ ह॒स्ताय॒ ।  
 स्वा॒हा॒द॒द॒ते॒ स्वा॒हा॒ पृ॒ण॒ते ।  
 स्वा॒हा॒ प्र॒य॒च्छ॒ते॒ स्वा॒हा॒ प्र॒ति॒गृ॒भ्ण॒ते॒ स्वा॒हा॑ ।  
 त्व॒ष्ट्रे॒ स्वा॒हा॒ चि॒त्रा॒यै॒ स्वा॒हा॑ ।  
 चै॒त्राय॒ स्वा॒हा॒ प्र॒जा॒यै॒ स्वा॒हा॑ ।  
 वा॒य॒वे॒ स्वा॒हा॒ नि॒ष्ठा॒यै॒ स्वा॒हा॑ ।  
 का॒म॒चा॒राय॒ स्वा॒हा॒ऽभि॒जि॒त्यै॒ स्वा॒हा॑ ।  
 इ॒न्द्रा॒ग्नि॒भ्या॒ स्वा॒हा॒ वि॒शा॒खा॒भ्या॒ स्वा॒हा॑ ।  
 श्रे॒ष्ठा॒याय॒ स्वा॒हा॒ऽभि॒जि॒त्यै॒ स्वा॒हा॑ ।  
 पौ॒र्ण॒मा॒स्यै॒ स्वा॒हा॒ का॒मा॒य॒ स्वा॒हा॒ ग॒त्यै॒ स्वा॒हा॑ ।

मि॒त्राय॑ स्वाहा॑ऽनू॒राधे॑भ्यः स्वाहा॑ ।  
मि॒त्रधे॑याय॒ स्वाहा॑ऽभि॒जित्यै॑ स्वाहा॑ ।  
इन्द्रा॑य॒स्वाहा॑ ज्ये॒ष्ठायै॑ स्वाहा॑ ।  
ज्ये॒ष्ठयाय॑ स्वाहा॑ऽभि॒जित्यै॑ स्वाहा॑ ।  
प्र॒जाप॑तये॒ स्वाहा॑ मू॒लाय॑ स्वाहा॑ ।  
प्र॒जायै॑ स्वाहा॑ ।  
अ॒द्भ्यः स्वाहा॑ऽषा॒ढाभ्यः॑ स्वाहा॑ ।  
स॒मुद्रा॑य॒ स्वाहा॑ का॒माय॑ स्वाहा॑ ।  
अ॒भिजि॑त्यै॒ स्वाहा॑ ।  
वि॒श्वेभ्यो॑ दे॒वेभ्यः॑ स्वाहा॑ऽषा॒ढाभ्यः॑ स्वाहा॑ ।  
अ॒न॒प॒ज॒य्याय॑ स्वाहा॑ जि॒त्यै॑ स्वाहा॑ ।  
ब्रह्म॑णे॒ स्वाहा॑ऽभि॒जिते॑ स्वाहा॑ ।  
ब्रह्म॑लो॒काय॑ स्वाहा॑ऽभि॒जित्यै॑ स्वाहा॑ ।  
विष्ण॑वे॒ स्वाहा॑ श्रो॒णायै॑ स्वाहा॑ ।  
श्लो॒काय॑ स्वाहा॑ श्रु॒ताय॑स्स्वाहा॑ ।  
वसु॑भ्यः॒ स्वाहा॑ श्र॒विष्ठा॑भ्यः॒ स्वाहा॑ ।  
अ॒ग्राय॑ स्वाहा॑ परी॒त्यै॑ स्वाहा॑ ।  
वरु॑णाय॒ स्वाहा॑ श॒तभि॑ष॒जे॒ स्वाहा॑ ।  
भे॒ष॒जेभ्यः॑ स्वाहा॑ ।  
अ॒जायै॑क॒पदे॑ स्वाहा॑ प्रो॒ष्ठप॑देभ्यः॒ स्वाहा॑ ।  
तेज॑से॒ स्वाहा॑ ब्रह्म॑वर्च॒साय॑ स्वाहा॑ ।  
अ॒हये॑ बु॒ध्नियाय॑ स्वाहा॑ प्रो॒ष्ठप॑देभ्यः॒ स्वाहा॑ ।  
पू॒ष्णे॑ स्वाहा॑ रे॒वत्यै॑ स्वाहा॑ ।  
प॒शुभ्यः॑ स्वाहा॑ ।  
अ॒श्विभ्या॑ ॐ स्वाहा॑ऽश्व॒युग्भ्या॑ ॐ स्वाहा॑ ।  
श्रो॒त्राय॑ स्वाहा॑ श्रु॒त्यै॑ स्वाहा॑ ।  
य॒माय॑ स्वाहा॑ऽप॒भर॑णीभ्यः॒ स्वाहा॑ ।

राज्याय स्वाहाऽभिजित्यै स्वाहा ।  
 अमावास्यायै स्वाहा कामाय स्वाहा गत्यै स्वाहा ।  
 चन्द्रमसे स्वाहा प्रतीदृश्यायै स्वाहा ।  
 अहोरात्रेभ्यः स्वाहाऽर्धमासेभ्यः स्वाहा ।  
 मासेभ्यः स्वाहर्तुभ्यः स्वाहा ।  
 संवत्सराय स्वाहा ।  
 अह्ने स्वाहा रात्रियै स्वाहा ।  
 अतिमुक्त्यै स्वाहा ।  
 उपसे स्वाहा व्युष्ट्यै स्वाहा ।  
 व्युषुष्यै स्वाहा व्युच्छन्त्यै स्वाहा ।  
 व्युष्टायै स्वाहा ।  
 नक्षत्राय स्वाहोदेष्यते स्वाहा ।  
 उद्यते स्वाहोदिताय स्वाहा ।  
 हरसे स्वाहा भरसे स्वाहा ।  
 भ्राजसे स्वाहा तेजसे स्वाहा ।  
 तपसे स्वाहा ब्रह्मवर्चसाय स्वाहा ।  
 सूर्याय स्वाहा नक्षत्रेभ्यः स्वाहा ।  
 प्रतिष्ठायै स्वाहा ।  
 आदित्यै स्वाहा प्रतिष्ठयै स्वाहा ।  
 विष्णवे स्वाहा यज्ञाय स्वाहा ।  
 प्रतिष्ठायै स्वाहा ॥  
 दधिक्राविण्णो अकारिषं जिष्णोरश्वस्य वाजिनः ।  
 सुरभि नो मुखाकरत् प्रण आयूषि तारिषत् ॥  
 आपोहिष्ठा मयो भुवस्तान ऊर्जे दधातन । महेरणाय चक्षसे ॥  
 योवः शिवतमो रसस्तस्य भाजयतेहनः । उशतीरिव मातरः ॥  
 तस्मा अरं गमाम वो यस्य क्षयाय जिन्वथ । आपो जनयथा च नः ॥  
 उदुत्तमं वरुणपाशमस्मदवाधमं विमध्यमं श्रथाय ।

अथा वयमादित्यव्रते तवानागसो अदितये स्याम ।  
 अस्तभ्राद् द्यामृषभो अन्तरिक्षममिमीत वरिमाणं पृथिव्या  
 आसीदद्विश्वा भुवनानि सम्राड्विश्वेत्तनि वरुणस्य व्रतानि ।  
 यत्किञ्चेदम् वरुणदैव्यै जनेऽभिद्रोहं मनुष्याश्चरामसि ।  
 अचित्तीयत्तव धर्मा युयोपिम मा नस्तस्मादेनसो देव रीरिषः ॥  
 कितवासो यद्रिरिपुर्न दीवि यद्वाघा सत्यमुतयन्न विद्म ।  
 सर्वा ता विष्य शिथिरेव देवथा ते स्याम वरुणप्रियासः ॥  
 अव ते हेडो वरुण नमोभिरवयज्ञेभिरीमहे हविर्भिः ।  
 क्षयन्नस्मभ्यमसुरप्रचेतो राजन्नेनासिशिश्रथः कृतानि ॥  
 तत्त्वायामि ब्रह्मणा वन्दमानस्तदाशास्ते यजमानो हविर्भिः ।  
 अहेडमानो वरुणेह बोध्युरुशंस मा न आयुः प्रमोषीः ॥

(पवमानम्)

हिरण्यवर्णाः शुचयः पावका यासु जातः कश्यपो यास्विन्द्रः ।  
 अग्निं या गर्भम् दधिरे विरूपास्तान् आपश्शंस्योना भवन्तु ॥  
 यासांस राजा वरुणो याति मध्ये सत्यानुते अवपश्यम् जनानाम् ।  
 मधुश्चुतश्शुचयो याः पावकास्ता न आपश्शंस्योना भवन्तु ॥  
 यासाम् देवा दिवि कृण्वन्ति भक्षं या अन्तरिक्षे बहुधा भवन्ति ।  
 याः पृथिवीम् पयसोन्दन्ति शुक्रास्ता न आपश्शंस्योना भवन्तु ॥  
 शिवेन मा चक्षुषा पश्यतापश्शिवया तनुवोप स्पृशत त्वचम् मे ।  
 सर्वांसग्नींस रप्सुषदो हुवो वो मयि वर्चो बलमोजो निधत्त ॥  
 पवमानस्सुवर्जनः । पवित्रेण विचर्षणिः ।  
 यः पोता स पुनातु मा । पुनन्तु मा देवजनाः ।  
 पुनन्तु मनवो धिया । पुनन्तु विश्व आयवः ।  
 जातवेदः पवित्रवत् । पवित्रेण पुनाहि मा ।  
 शुक्त्रेण देवदीद्यत् । अग्ने ऋत्वा ऋतुंस रनु ।  
 यत्ते पवित्रमर्चिषि । अग्ने विततमन्तरा ।

ब्रह्म तेन पुनीमहे । उभाभ्यां देवसवितः ।  
 पवित्रेण सवेन च । इदं ब्रह्म पुनीमहे ।  
 वैश्वदेवी पुनती देव्यागात् । यस्यै बह्वीस्तनुवो वीतपुष्पाः ।  
 तथा मदन्तः सधमाद्येषु । वयं स्याम पतयो रयीणाम् ।  
 वैश्वानरो रश्मिभिर्मा पुनातु । वातः प्राणेनेषिरो मयो भूः ।  
 ध्यावापृथिवी पयसा पयोभिः । ऋतावरी यज्ञिये मा पुनीताम् ।  
 बृहद्भिः सवितस्तृभिः । वषिष्ठैर्देवमन्मभिः ।  
 अग्ने दक्षैः पुनाहि मा । येन देवा अपुनत ।  
 येनापो दिव्यंकशः । तेन दिव्येन ब्रह्मणा ।  
 इदं ब्रह्म पुनीमहे । यः पावमानीरध्येति ।  
 ऋषिभिस्सम्भृतं रसम् । सर्वं स पूतमश्नाति ।  
 स्वदितम् मातरिश्वना । पावमानीर्यो अध्येति ।  
 ऋषिभिस्सम्भृतं रसम् । तस्मै सरस्वती दुहे ।  
 क्षीरं सर्पिर्मधूदकम् । पावमानीस्स्वस्तयनीः ।  
 सुदुघाहि पयस्वतीः । ऋषिभिस्सम्भृतो रसः ।  
 ब्राह्मणेष्वमृतं हितम् । पावमानीदिशन्तु नः ।  
 इमं लोकमथो अमुम् । कामान्त्समर्धयन्तु नः ।  
 देवीर्देवैः समाभृताः । पावमानीस्स्वस्त्ययनीः ।  
 सुदुघाहि घृतश्चुतः । ऋषिभिस्सम्भृतो रसः ।  
 ब्राह्मणेष्वमृतं हितम् । येन देवाः पवित्रेण ।  
 आत्मानं पुनते सदा । तेन सहस्रधारेण ।  
 पावमान्यः पुनन्तु मा । प्राजापत्यम् पवित्रम् ।  
 शतोध्यामं हिरण्मयम् । तेन ब्रह्म विदो वयम् ।  
 पूतं ब्रह्म पुनीमहे । इन्द्रस्सुनीती सहमा पुनातु ।  
 सोमस्स्वस्त्या वरुणस्समीच्या । यमो रजा प्रमृणाभिः पुनातु मा ।  
 जातवेदा मोर्जयन्त्या पुनातु । भूर्भुवस्सुवः ।  
 तच्छं योरावृणीमहे । गातुं यज्ञाय ।

गा॒तुं य॒ज्ञ॒प॒तये । दै॒वी॑स्स्व॒स्तिर॑स्तु नः ।

स्व॒स्तिर्मा॑नु॒षेभ्यः । ऊ॒र्ध्वं जि॑गातु भे॒षज॑म् ।

शन्नो॑ अस्तु द्वि॒पदे॑ । शं चतु॑ष्पदे ।

ॐ शान्ति॑श्शान्ति॑श्शान्तिः ।

नमो॑ ब्रह्म॒णे नमो॑ अस्त्व॒ग्रये॑ नमः पृथि॒व्यै नम॑ ओष॒धीभ्यः॑ ।

नमो॑ वा॒चे नमो॑ वा॒चस्प॑तये विष्णवे बृ॒हते॑ करोमि ॥

ॐ शान्ति॑श्शान्ति॑श्शान्तिः ।

॥ प्रोक्षण मन्त्राः ॥

आपो॑हिष्ठा म॒यो भुव॑स्तान ऊ॒र्जे द॑धातन । म॒हेर॑णाय चक्ष॒से ॥

योवः॑ शि॒वत॑मो रस॒स्तस्य॑ भाजयते॒हनः॑ । उ॒शती॑रिव मा॒तरः॑ ॥

तस्मा॑ अरं ग॒माम॑ वो य॒स्य क्ष॑याय जिन्वथ । आपो॑ ज॒नय॑था च नः ॥

दे॒वस्य॑ त्वा स॒वितुः॑ प्र॒सवे॑ । अ॒श्विनो॑र्बा॒हुभ्या॑म् । पू॒ष्णो ह॑स्ता॒भ्याम् ।

अ॒श्विनो॑र्भैष॒ज्येन॑ । तेज॑से ब्रह्मवर्च॒साया॑भिषिञ्चामि ॥

दे॒वस्य॑ त्वा स॒वितुः॑ प्र॒सवे॑ । अ॒श्विनो॑र्बा॒हुभ्या॑म् । पू॒ष्णो ह॑स्ता॒भ्याम् ।

सर॑स्वत्यै भैष॒ज्येन॑ । वी॒र्या॑या॒न्नाद्या॑याभिषिञ्चामि ॥

दे॒वस्य॑ त्वा स॒वितुः॑ प्र॒सवे॑ । अ॒श्विनो॑र्बा॒हुभ्या॑म् । पू॒ष्णो ह॑स्ता॒भ्याम् ।

इन्द्र॑स्येन्द्रि॒येण॑ । श्रि॒ये यश॑से ब॒लाया॑भिषिञ्चामि ॥

दे॒वस्य॑ त्वा स॒वितुः॑ प्र॒सवे॑ऽश्विनो॑र्बा॒हुभ्या॑म् पू॒ष्णो ह॑स्ता॒भ्याम् ॐ

सर॑स्वत्यै वा॒चो य॒न्तुर्य॑त्रेणाग्नेस्त्वा सा॒म्राज्ये॑नाभिषिञ्चामि ॥

दे॒वस्य॑ त्वा स॒वितुः॑ प्र॒सवे॑ऽश्विनो॑र्बा॒हुभ्या॑म् पू॒ष्णो ह॑स्ता॒भ्याम् ॐ

सर॑स्वत्यै वा॒चो य॒न्तुर्य॑त्रेण बृ॒हस्प॑तेस्त्वा सा॒म्राज्ये॑नाभिषिञ्चामि ॥

द्रु॒पदा॑दि॒व मु॒ञ्चतु॑ । द्रु॒पदा॑दि॒वेन्मु॒मुचा॑नः ।

स्वि॒न्नः स्ना॒त्वी म॒लादि॑व । पू॒तं प॒वित्रे॑णे॒वाज्य॑म् ।

आप॑श्शुन्धन्तु॒ मै॒नसः॑ ।

आपो॑ वा इ॒दं सर्वं॑ विश्वा॑ भू॒तान्या॑पः प्रा॒णा वा आपः॑

पशव॑ आपोऽन्न॑मापोऽमृत॑मापः॑ सम्राडापो॑ विराडापः॑  
 स्वराडापश्छन्दा॑ स्यापो॑ ज्योती॑ ष्यापो॑  
 यजू॑ ष्यापस्सत्य॑मापस्सर्वा॑ देवता॑ आपो॑  
 भूर्भुव॑स्सुवराप॑ ॐ ॥

॥ उदकशान्ति - मन्त्रपाठः समाप्तः ॥

## निःस्वरः

ॐ

ब्रह्मजज्ञानं प्रथमं पुरस्तात् विसीमतस्सुरुचो वेन आवः ।  
 सबुध्निया उपमास्यविष्ठः सतश्च योनिमसत्क्षविवः ॥

आपो वा इदं सर्वं विश्वा भूतान्यापः प्राणा वा आपः  
 पशव आपोऽन्नमापोऽमृतमापः सम्राडापो विराडापः  
 स्वराडापश्छन्दा स्यापो ज्योती ष्यापो  
 यजू ष्यापस्सत्यमापस्सर्वा देवता आपो  
 भूर्भुवस्सुवराप ॐ ॥

अपः प्रणयति । श्रद्धावा आपः ।  
 श्रद्धां एवारभ्य प्रणीय प्रचरति  
 अपः प्रणयति । यज्ञो वै आपः ।  
 यज्ञं एवारभ्य प्रणीय प्रचरति  
 अपः प्रणयति । वज्रो वै आपः ।  
 वज्रमेव भ्रातृव्येभ्यः प्रहृत्य प्रणीय प्रचरति ।  
 अपः प्रणयति । आपो वै रक्षोघ्नीः ।  
 रक्षसां अपहत्यै ।  
 अपः प्रणयति । आपो वै देवानां प्रियंधाम ।  
 देवानामेव प्रियंधाम प्रणीय प्रचरति ।  
 अपः प्रणयति । आपो वै सर्वा देवताः ।  
 देवता एवारभ्य प्रणीय प्रचरति ।  
 आपोवैशान्ताः । शान्ताभिरेवास्य शुचं शमयति ॥

देवो वस्सविता उत्पुनातु । अच्छिद्रेण पवित्रेण । वसोः सूर्यस्य रश्मिभिः ।

स हि रत्नानि दाशुषै सुवाति सविता भगः । तं भागं चित्रमीमहे ॥

ॐ

अग्निमीळे पुरोहितं यज्ञस्य देवमृत्विजम् । होतारं रत्नधातमम् ॥

इषेत्वोर्जे त्वा वायवस्थोपायवस्थ देवो वः सविता प्रार्पयतु श्रेष्ठतमाय कर्मणे ॥

अग्र आयाहि वीतये गृणानो हव्यदातये । निहोता सत्सि बर्हिषि ॥

शन्नो देवीरभिष्टय आपो भवन्तु पीतये । शंयोरभिस्रवन्तु नः ॥

कृणुष्व पाजः प्रसितिन्न पृथ्वीं याहि राजेवामवाँ इभेन ।

तृष्वीमनु प्रसितिं द्रूणानोऽस्ताऽसि विध्य रक्षसस्तपिष्टैः ॥

तव भ्रमास आशुया पतन्त्यनु स्पृश धृषता शोशुचानः ।

तपूँष्यग्ने जुहा पतङ्गानसन्दितो वि सृज विष्वगुल्काः ॥

प्रति स्पशो वि सृज तूर्णितमो भवा पायुर्विशो अस्या अदब्धः ।

यो नो दूरे अघशँसो यो अन्त्यग्ने माकिष्टे व्यथिरादधर्षीत् ॥

उदग्ने तिष्ठ प्रत्याऽऽतनुष्व न्यमित्राँ ओषतात् तिग्महेते ।

यो नो अरातिँ समिधान चक्रे नीचा तं धक्ष्यतसं न शुष्कम् ॥

ऊर्ध्वो भव प्रति विध्याध्यस्मदाविष्कृणुष्व दैव्यान्यग्ने ।

अव स्थिरा तनुहि यातुजूनां जामिमजामिं प्र मृणीहि शत्रून् ॥

स ते जानाति सुमतिं यविष्ठ य ईवते ब्रह्मणे गातुमैरत् ।

विश्वान्यस्मै सुदिनानि रायो द्युम्रान्यर्यो वि दुरो अभि द्यौत् ॥

सेदग्ने अस्तु सुभगस्सुदानुर्यस्त्वा नित्येन हविषा य उक्थैः ।

पिप्रीषति स्व आयुषि दुरोणे विश्वेदस्मै सुदिना सासदिष्टिः ॥

अर्चामि ते सुमतिं घोष्यर्वाक् सन्ते वावाता जरतामियं गीः ।

स्वश्वास्त्वा सुरथा मर्जये मास्मे क्षत्राणि धारयेरनु द्यून् ॥

इह त्वा भूर्या चरे दुपत्मन्दोषावस्तर्दी दिवाँ समनु द्यून् ।

क्रीडन्तस्त्वा सुमनसस्सपेमाभि द्युम्ना तस्थिवाँसो जनानाम् ॥

यस्त्वा स्वश्वस्सु हिरण्यो अग्र उपयाति वसुमता रथेन ।

तस्य त्राता भवसि तस्य सखा यस्त आतिथ्यमानुषग् जुजोषत् ॥

महो रुजामि बन्धुता वचोभिस्तन्मा पितुर्गोतमादन्वियाय ।

त्वन्नो अस्य वचसश्चिकिद्धि होतर्यविष्ठ सुक्रतो दमूनाः ॥  
 अस्वप्रजस्तरणयस्सुशेवा अतन्द्रासोऽवृका अश्रमिष्ठाः ।  
 ते पायवस्सप्रियञ्चो निषद्याऽग्ने तव नः पान्त्वमूर ॥  
 ये पायवो मामतेयन्ते अग्ने पश्यन्तो अन्धन्दुरितादरक्षन् ।  
 ररक्ष तान्सुकृतो विश्ववेदा दिप्सन्त इद्रिपवो नाह देभुः ॥  
 त्वया वयं सधन्यस्त्वोतास्तव प्रणीत्याश्याम वाजान् ।  
 उभा शंसा सूदय सत्यतातेऽनुष्ठुया कृणुह्यहयाण ॥  
 अया ते अग्ने समिधा विधेम प्रति स्तोमं शस्यमानं गृभाय ।  
 दहाशसो रक्षसः पाह्यस्मान्द्रुहो निदो मित्रमहो अवघात् ॥  
 रक्षोहणं वाजिनमाऽऽजिघर्मि मित्रं प्रथिष्ठमुपयामि शर्म ।  
 शिशानो अग्निः क्रतुभिस्समिद्धस्स नो दिवा स रिषः पातु नक्तम् ॥  
 विज्योतिषा बृहता भात्यग्निराविर्विश्वानि कृणुते महित्वा ।  
 प्रादेवीर्मायास्सहते दुरेवाः शिशीते शृङ्गे रक्षसे विनिक्षे ॥  
 उत स्वानासो दिविषन्त्वग्नेस्तिग्मायुधा रक्षसे हन्त वा उ ।  
 [मदे चिदस्य प्ररुजन्ति भामा न वरन्ते परिबाधो अदेवीः ॥ ]  
 (The line in [ ] is usually not chanted for auspicious occasions and  
 is included for completeness.)

इन्द्रं वो विश्वतस्परि हवामहे जनेभ्यः । अस्माकमस्तु केवलः ।  
 इन्द्रन्नरो नेमधिता हवन्ते यत्पार्या युनजते धियस्ताः ।  
 शूरो नृषाता शवसश्चकान आ गोमति ब्रजे भजा त्वन्नः ।  
 इन्द्रियाणि शतक्रतो या ते जनेषु पञ्चसु । इन्द्र तानि त आ वृणे ।  
 अनु ते दायि मह इन्द्रियाय सत्रा ते विश्वमनु वृत्रहत्यै ।  
 अनु क्षत्रमनु सहो यजत्रेन्द्र देवेभिरनु ते नृषह्ये ।  
 आ यस्मिन्सप्त वासवास्तिष्ठन्ति स्वारुहो यथा ।  
 ऋषिर्ह दीर्घश्रुत्तम इन्द्रस्य घर्मो अतिथिः ।  
 आमाम्सु पक्कमैरय आसूर्यं रोहयो दिवि ।  
 घर्मन्न सामन्तपता सुवृक्तिभिर्जुष्टं गिर्वणसे गिरः ।  
 इन्द्रमिद्गाथिनो बृहदिन्द्रमर्केभिरर्किणः । इन्द्रं वाणीरनूषत ।  
 गायन्ति त्वा गायत्रिणोऽर्चन्त्यर्कमर्किणः ।

ब्रह्माणस्त्वा शतक्रतवुद्धं शमिव येमिरे ।  
 अहोमुचे प्र भरेमा मनीषा मोषिष्ठदात्रे सुमतिं गृणानाः ।  
 इदमिन्द्र प्रति हव्यं गृभाय सत्याः सन्तु यजमानस्य कामाः ।  
 विवेष यन्मा धिषणा जजान स्तवै पुरा पार्यादिन्द्रमहः ।  
 अहसो यत्र पीपरद्यथा नो नावेव यान्तमुभये हवन्ते ।  
 प्र सम्राजं प्रथममध्वरणामहो मुचं वृषभं यज्ञियानाम् ।  
 अपान्नपातमश्विना हयन्तमस्मिन्नर इन्द्रियं धत्तमोजः ।  
 वि न इन्द्र मृधो जहि नीचा यच्छ पृतन्यतः ।  
 अधस्पदन्तमीं कृधि यो अस्मा अभिदासति ।  
 इन्द्र क्षत्रमभि वाममोजोऽजायथा वृषाभ चर्षणीनाम् ।  
 अपानुदो जनममित्र यन्तमुरुं देवेभ्यो अकृणोरु लोकम् ।  
 मृगो न भीमः कुचरो गिरिष्ठाः परावतः आ जगामा परस्याः ।  
 सूकं सशाय पविमिन्द्र तिग्मं विशत्रून् ताढि विमृधो नुदस्व ।  
 वि शत्रून् वि मृधो नुद वि वृत्रस्य हनू रुज ।  
 विमन्युमिन्द्र भामितोऽमित्रस्याभिदासतः ।  
 त्रातारमिन्द्रमवितारमिन्द्रं हवे हवे सुहव शूरमिन्द्रम् ।  
 हुवे नु शक्रं पुरुहूतमिन्द्रं स्वस्ति नो मघवा धात्विन्द्रः ।  
 मा ते अस्या सहसावन् परिष्ठावधाय भूम हरिवः परादै ।  
 त्रायस्व नोऽवृकेभिर्वरुथैस्तव प्रियासस्सूरिषु स्याम ।  
 अनवस्ते रथमश्वाय तक्षन् त्वष्टा वज्रं पुरुहूत द्युमन्तम् ।  
 ब्रह्माण इन्द्रं महयन्तो अर्कैरवर्धयन्नहये हन्त वा उ ।  
 वृष्णे यत् ते वृषणो अर्कमर्चानिन्द्र ग्रावाणो अदितिस्सजोषाः ।  
 अनश्वसो ये पवयोऽरथा इन्द्रेषिता अभ्यवर्तन्त दस्यून् ।  
 यत इन्द्र भयामहे ततो नो अभयं कृधि ।  
 मघवञ्छग्धि तव तन्न ऊतये विद्विषो विमृधो जहि ।  
 स्वस्तिदा विशस्पतिर्वृत्रहा विमृधो वशी ।  
 वृषेन्द्रः पुर एतु नः स्वस्तिदा अभयंकरः ।  
 महा इन्द्रो वज्रबाहुः षोडशी शर्म यच्छतु ।  
 स्वस्ति नो मघवा करोतु हन्तु पाप्मानं योऽस्मान् द्वेष्टि ।  
 सजोषा इन्द्र सगणो मरुद्विस्सोमं पिब वृत्रहञ्छूर विद्वान् ।  
 जहि शत्रूरपमृधोनुदस्वाथाभयं कृणु हि विश्वतो नः ।

ये देवाः पुरस्सदोऽग्नि नेत्रा रक्षोहणस्तेनः पान्तु  
ते नोऽवन्तु तेभ्यो नमस्तेभ्यः स्वाहा  
ये देवा दक्षिणसदो यमनेत्रा रक्षोहणस्तेनः पान्तु  
ते नोऽवन्तु तेभ्यो नमस्तेभ्यः स्वाहा  
ये देवा पश्चात् सदसवितु नेत्रा रक्षोहणस्तेनः पान्तु  
ते नोऽवन्तु तेभ्यो नमस्तेभ्यः स्वाहा  
ये देवा उत्तरसदो वरुणनेत्रा रक्षोहणस्तेनः पान्तु  
ते नोऽवन्तु तेभ्यो नमस्तेभ्यः स्वाहा  
ये देवा उपरिषदो बृहस्पतिनेत्रा रक्षोहणस्तेनः पान्तु  
ते नोऽवन्तु तेभ्यो नमस्तेभ्यः स्वाहाऽग्नये रक्षोघ्ने स्वाहा यमाय रक्षोघ्ने स्वाहा  
सवित्रे रक्षोघ्ने स्वाहा वरुणाय रक्षोघ्ने स्वाहा बृहस्पतये दुवस्पते रक्षोघ्ने स्वाहा ।

अग्निरायुष्मान्त्स वनस्पतिभिरायुष्मान्तेन त्वाऽऽयुषाऽऽयुष्मन्तं करोमि ।  
सोम आयुष्मान्त्स ओषधीभिरायुष्मान्तेन त्वाऽऽयुषाऽऽयुष्मन्तं करोमि ।  
यज्ञ आयुष्मान्त्स दक्षिणाभिरायुष्मान्तेन त्वाऽऽयुषाऽऽयुष्मन्तं करोमि ।  
ब्रह्मायुष्मत्तद् ब्राह्मणैरायुष्मन्तेन त्वाऽऽयुषाऽऽयुष्मन्तं करोमि ।  
देवा आयुष्मन्तस्तेऽमृतेनायुष्मन्तस्तेन त्वाऽऽयुषाऽऽयुष्मन्तं करोमि ।

या वामिन्द्रा वरुणा यतव्या तनूस्तयेमम५ हसो मुंचतम् ।  
या वामिन्द्रा वरुणा सहस्या तनूस्तयेमम५ हसो मुंचतम् ।  
या वामिन्द्रा वरुणा रक्षस्या तनूस्तयेमम५ हसो मुंचतम् ।  
या वामिन्द्रा वरुणा तेजस्या तनूस्तयेमम५ हसो मुंचतम् ।

यो वामिन्द्रा वरुणावग्नौ स्नामस्तं वामेतेनाव यजे  
यो वामिन्द्रा वरुणा द्विपात्सु पशुषु स्नामस्तं वामेतेनाव यजे  
यो वामिन्द्रा वरुणा चतुष्पत्सु पशुषु स्नामस्तं वामेतेनाव यजे  
यो वामिन्द्रा वरुणा गोष्ठे स्नामस्तं वामेतेनाव यजे  
यो वामिन्द्रा वरुणा गृहेषु स्नामस्तं वामेतेनाव यजे  
यो वामिन्द्रा वरुणाप्सु स्नामस्तं वामेतेनाव यजे  
यो वामिन्द्रा वरुणौषधीषु स्नामस्तं वामेतेनाव यजे  
यो वामिन्द्रा वरुणा वनस्पतिषु स्नामस्तं वामेतेनाव यजे ॥

अग्नेयशस्विन्यशसे ममर्पयेन्द्रावतीमपचितीमिहावह ।  
अयं मूर्धा परमेष्ठी सुवर्चास्समानानामुत्तमश्लोको अस्तु ॥

भद्रं पश्यन्त उपसेदुरग्रे तपो दीक्षामृषयः सुवर्षिदः ।  
ततः क्षत्रं बलमोजश्च जातं तदस्मै देवा अभि सन्नमन्तु ॥

धाता विधात परमोतसंधृक् प्रजापतिः परमेष्ठी विराजा ।  
स्तोमाशृद्धंदाँसि निविदोम आहुरेतस्मै राष्ट्रमभिसन्नमाम ॥

अभ्यावर्तध्वमुपमेतसाक मयँ शास्ताऽधिपतिर्वो अस्तु ।  
अस्य विज्ञानमनुसँरभध्वमिमं पश्चादनु जीवाथ सर्वे ॥

॥ राष्ट्रभृतम् ॥

ऋताषाडृतधामाग्निर्गन्धर्वस्स इदं ब्रह्मक्षत्रं पातु तस्मै स्वाहा ।  
तस्यौषधयोऽप्सरस ऊर्जो नाम ता इदं ब्रह्मक्षत्रं पान्तु ताभ्यः स्वाहा ।  
सँहितो विश्वसामा सूर्यो गन्धर्वः स इदं ब्रह्मक्षत्रं पातु तस्मै स्वाहा ।  
तस्य मरीचयोऽप्सरस आयुवो नाम ता इदं ब्रह्मक्षत्रं पान्तु ताभ्यः स्वाहा ।  
सुषुम्नः सूर्यरश्मिश्चन्द्रमा गन्धर्वः स इदं ब्रह्मक्षत्रं पातु तस्मै स्वाहा ।  
तस्य नक्षत्राण्यऽप्सरसो बेकुरयो नाम ता इदं ब्रह्मक्षत्रं पान्तु ताभ्यः स्वाहा ।  
भुज्युस्सुपर्णो यज्ञो गन्धर्वः स इदं ब्रह्मक्षत्रं पातु तस्मै स्वाहा ।  
तस्य दक्षिणा अप्सरसस्तवा नाम ता इदं ब्रह्मक्षत्रं पान्तु ताभ्यः स्वाहा ।  
प्रजापतिर्विश्वकर्मा मनो गन्धर्वः स इदं ब्रह्मक्षत्रं पातु तस्मै स्वाहा ।  
तस्यर्क्षामान्यप्सरसो वह्नयो नाम ता इदं ब्रह्मक्षत्रं पान्तु ताभ्यः स्वाहा ।  
इषिरो विश्वव्यचा वातो गन्धर्वः स इदं ब्रह्मक्षत्रं पातु तस्मै स्वाहा ।  
तस्यापोऽप्सरसो मुदा नाम ता इदं ब्रह्मक्षत्रं पान्तु ताभ्यः स्वाहा ।

भुवनस्य पते यस्य त उपरि गृहा इह च ।

सनोरास्वाज्यानिँ रायस्पोषाँ सुवीर्यँ संवत्सरीणाँ स्वस्तिँ स्वाहा ।

परमेष्ठयधिपतिर्मृत्युर्गन्धर्वः स इदं ब्रह्मक्षत्रं पातु तस्मै स्वाहा ।  
तस्य विश्वमप्सरसो भुवो नाम ता इदं ब्रह्मक्षत्रं पान्तु ताभ्यः स्वाहा ।  
सुक्षितिस्सुभूतिर्भद्रकृत्सुवर्वाल्पर्जन्यो गन्धर्वः स इदं ब्रह्मक्षत्रं पातु तस्मै स्वाहा ।  
तस्य विद्युतोऽप्सरसो रुचो नाम ता इदं ब्रह्मक्षत्रं पान्तु ताभ्यः स्वाहा ।  
दूरे हेतिरमृडयो मृत्युर्गन्धर्वः स इदं ब्रह्मक्षत्रं पातु तस्मै स्वाहा ।  
तस्य प्रजा अप्सरसो भीरुवो नाम ता इदं ब्रह्मक्षत्रं पान्तु ताभ्यः स्वाहा ।  
चारुः कृपणकाशी कामो गन्धर्वः स इदं ब्रह्मक्षत्रं पातु तस्मै स्वाहा ।  
तस्याधयोऽप्सरसश्शोचयतीर्नाम ता इदं ब्रह्मक्षत्रं पान्तु ताभ्यः स्वाहा ।

सनो भुवनस्य पते यस्य त उपरि गृहा इह च ।

उरुब्रह्मणेस्मै क्षत्राय महि शर्म यच्छ स्वाहा॥

नमो अस्तु सर्पेभ्यो ये के च पृथिवीमनु ।

ये अन्तरिक्षे ये दिवि तेभ्यः सर्पेभ्यो नमः ॥

येऽदो रोचने दिवो ये वा सूर्यस्य रश्मिषु ।

येषामप्सु सदः कृतं तेभ्यः सर्पेभ्यो नमः ॥

या इषवो यातुधानानां ये वा वनस्पतीं रनु ।

ये वाऽवटेषु शेरते तेभ्यः सर्पेभ्यो नमः ॥

॥ पंचचोडाः ॥

अयम्पुरो हरिकेशः सूर्यरश्मिस्तस्य रथगृत्सश्च रथौजाश्च सेनानिग्रामण्यौ  
पुञ्जिकस्थला च कृतस्थला चाप्सरसौ यातुधाना हेति रक्षं सि प्रहेतिस्तेभ्यो  
नमस्ते नो मृडयन्तु ते यं द्विष्मो यश्च नो द्वेष्टि तं वो जंभे दधामि ।

अयं दक्षिणा विश्वकर्मा तस्य रथस्वनश्च रथे चित्रश्च सेनानिग्रामण्यौ  
मेनका च सहजन्या चाप्सरसौ

दङ्गवः पशवो हेति पौरुषेयोवधः प्रहेतिस्तेभ्यो

नमस्ते नो मृडयन्तु ते यं द्विष्मो यश्च नो द्वेष्टि तं वो जंभे दधामि ।

अयं पश्चाद्विश्वव्यचास्तस्य रथप्रोतश्चासमरथश्च सेनानिग्रामण्यौ  
प्रम्लोचन्ती चानुम्लोचन्ती चाप्सरसौ सर्पा हेतिर्व्याघ्राः प्रहेतिस्तेभ्यो  
नमस्ते नो मृडयन्तु ते यं द्विष्मो यश्च नो द्वेष्टि तं वो जंभे दधामि ।

अयमुत्तरात्संयद्वसुस्तस्य सेनजिच्च सुषेणश्च सेनानिग्रामण्यौ  
विश्वाची च घृताची चाप्सरसावापो हेतिर्वातः प्रहेतिस्तेभ्यो  
नमस्ते नो मृडयन्तु ते यं द्विष्मो यश्च नो द्वेष्टि तं वो जंभे दधामि ।

अयमुपर्यर्वाग्वसुस्तस्य ताक्ष्यश्चारिष्टनेमिश्च सेनानिग्रामण्यावुर्वशी  
पूर्वचित्तिश्चाप्सरसौ विद्युद्धेतिरवस्फूर्जन्प्रहेतिस्तेभ्यो  
नमस्ते नो मृडयन्तु ते यं द्विष्मो यश्च नो द्वेष्टि तं वो जंभे दधामि ।

॥ अप्रतिरथम् ॥

आशुः शिशानो वृषभो न युध्मो घनाघनः क्षोभणश्चर्षणीनाम् ।

संक्रन्दनोऽनिमिष एकवीरः शतं सेना अजयत्साकामिन्द्रः ॥

संक्रन्दनेनानिमिषेण जिष्णुना युत्कारेण दुश्चवनेन धृष्णुना ।  
तदिन्द्रेण जयत तत् सहध्वं युधो नर इषुहस्तेन वृष्णा ॥  
स इषुहस्तैः स निषङ्गिभिर्वशी स ५ स्रष्टा स युध इन्द्रो गणेन ।  
स ५ सृष्टजित् सोमपा बाहुशर्ध्यूर्ध्वधन्वा प्रतिहिताभिरस्ता ॥  
बृहस्पते परि दीयारथेन रक्षोहाऽमित्रा ५ अपबाधमानः ।  
प्रभञ्जन्त्सेनाः प्रमृणो युधा जयन्नस्माकमेध्यविता रथानाम् ॥  
गोत्रभिदं गोविदं वज्रबाहुं जयन्तमज्म प्रमृणन्तमोजसा ।  
इम ५ सजाता अनु वीरयध्वमिन्द्र ५ सखायोऽनु स ५ रभध्वम् ॥  
बलविज्ञायः स्थविरः प्रवीरः सहस्वान् वाजी सहमान उग्रः ।  
अभिबीरो अभिसत्वा सहोजा जैत्रमिन्द्र रथमा तिष्ठ गोवित् ॥  
अभिगोत्राणि सहसा गाहमानोऽदायो वीरश्शतमन्युरिन्द्रः ।  
दुश्चवनः पृतनाषाडयुद्धोऽस्माक ५ सेना अवतु प्र युत्सु ॥  
इन्द्र आसां नेता बृहस्पतिर्दक्षिन्गा यज्ञः पुर एतु सोमः ।  
देवसेनानामभिभञ्जतीनां जयन्तीनां मरुतो यन्त्वग्रे ॥  
इन्द्रस्य वृष्णो वरुणस्य राज्ञ आदित्यानां मरुता ५ शर्ध उग्रम् ।  
महामनसां भुवनच्यवानां घोषो देवानां जयतामुदस्थात् ॥  
अस्माकमिन्द्रः समृतेषु ध्वजेष्वस्माकं या इषवस्ता जयन्तु ।  
अस्माकं वीरा उत्तरे भवन्त्वस्मानु देवा अवता हवेषु ॥  
उद्धर्षय मघवन्नायुधान्युत् सत्वनां मामकानां महा ५ सि ।  
उद् वृत्रहन् वाजिनां वाजिनान्युद्रथानां जयतामेतु घोषः ॥  
उप प्रेत जयता नरः स्थिरा वस्सन्तु बाहवः ।  
इन्द्रो वश्रर्म यच्छत्वनाधृष्या यथाऽसथ ॥  
अवसृष्टा परा पत शरव्ये ब्रह्मस ५ शिता ।  
गच्छामित्रान् प्रविश मैषां कं चनोच्छिषः ॥  
मर्माणि ते वर्मभिश्छादयामि सोमस्त्वा राजाऽमृतेनाभिऽवस्ताम् ।  
उरोर्वरीयो वरिवस्ते अस्तु जयन्तं त्वामनु मदन्तु देवाः ॥  
यत्र बाणाः सम्पतन्ति कुमारा विशिखा इव ।  
इन्द्रो नस्तत्र वृत्रहा विश्वाहा शर्म यच्छतु ॥

शं च मे मयश्च मे प्रियं च मेऽनुकामश्च मे  
 कामश्च मे सौमनसश्च मे भद्रं च मे श्रेयश्च मे  
 वस्यश्च मे यशश्च मे भगश्च मे द्रविणं च मे  
 यन्ता च मे धर्ता च मे क्षेमश्च मे धृतिश्च मे  
 विश्वं च मे महश्च मे संविच्च मे ज्ञात्रं च मे  
 सूश्च मे प्रसूश्च मे सीरं च मे लयश्च  
 म ऋतं च मेऽमृतं च मेऽयक्ष्मं च मेऽनामयच्च मे  
 जीवातुश्च मे दीर्घायुत्वं च मेऽनमित्रं च मेऽभयं च मे  
 सुगं च मे शयनं च मे सूषा च मे सुदिनं च मे ॥

॥ विहव्यम् ॥

ममाग्ने वर्चो विहवेष्वस्तु वयं त्वेन्धानास्तनुवं पुषेम ।  
 मह्यं नमन्तां प्रदिशश्चतस्रस्त्वयाऽध्यक्षेण पृतना जयेम ॥  
 मम देवा विहवे सन्तु सर्व इन्द्रावन्तो मरुतो विष्णुरग्निः ।  
 ममान्तरिक्षमुरु गोपमस्तु मह्यं वातः पवतां कामे अस्मिन् ॥  
 मयि देवा द्रविणमा यजन्तां मय्याशीरस्तु मयि देवहूतिः ।  
 दैव्या होतारा वनिषन्त पूर्वेऽरिष्टास्स्याम तनुवा सुवीराः ॥  
 मह्यं यजन्तु मम यानि हव्याऽऽकूतिः सत्या मनसो मे अस्तु ।  
 एनो मा नि गां कतमच्चनाहं विश्वे देवासो अधि वोचता मे ॥  
 देवीर्षड्वीरुरुणः कृणोत विश्वे देवास इह वीरयध्वम् ।  
 मा हास्महि प्रजया मा तनूभिर्मा रधाम द्विषते सोम रजन् ॥  
 अग्निर्मन्युं प्रतिनुदन् पुरस्ताददब्धो गोपाः परिपाहि नस्त्वम् ।  
 प्रत्यञ्चो यन्तु निगुतः पुनस्तेऽमैषां चित्तं प्रबुधा विनेशत् ॥  
 धाता धातृणां भुवनस्य यस्पतिर्देवः सवितारमभिमातिषाहम् ।  
 इमं यजन्मश्विनोभा बृहस्पतिर्देवाः पान्तु यजमानत्रयर्थात् ॥  
 उरुव्यचा नो महिषश्शर्म यः सदस्मिन् हवे पुरुहूतः पुरुक्षु ।  
 स नः प्रजायै हर्यश्च मृडयेन्द्र मा नो रीरिषो मा परा दाः ॥  
 येनस्सपत्ना अप ते भवन्त्विन्द्राग्निभ्यामव बाधामहे तान् ।  
 वसवो रुद्रा आदित्या उपरिस्पृशं मोग्रं चेतारमधिराजमक्रन् ॥

अर्वाञ्चमिन्द्रममुतो हवामहे यो गोजिद्धनजिदश्वजिद्यः ।  
इमं नो यज्ञं विहवे जुषस्वास्य कुर्मो हरिवो मेदिनं त्वा ॥

॥ मृगारम् ॥

अग्नेर्मन्वे प्रथमस्य प्रचेतसो यं पाञ्चजन्यं बहवस्समिन्धते ।  
विश्वस्यां विशि प्रविशिवाꣳ समीमहे स नो मुञ्चत्वꣳ हसः ॥

यस्येदं प्राणन्निमिषद्यदेजति यस्य जातं जनमानं च केवलम् ।  
स्तौम्यग्निं नाथितो जोहवीमि सनो मुञ्चत्वꣳ हसः ॥

इन्द्रस्य मन्ये प्रथमस्य प्रचेतसो वृत्रघ्नः स्तोमा उप मामुपागुः ।  
यो दाशुषः सुकृतो हवमुप गन्ता स नो मुञ्चत्वꣳ हसः ॥

यः संग्रामं नयति संवशी युधे यः पुष्टानि सꣳसृजति त्रयाणि ।  
स्तौमीन्द्रं नाथितो जोहवीमि स नो मुञ्चत्वꣳ हसः ॥

मन्वे वां मित्रावरुणा तस्य वित्तꣳ सत्यौजसा दृꣳहणा यन्नुदेथे ।  
या राजानꣳ सरथं याथ उग्रा ता नो मुञ्चतमागसः ॥

यो वाꣳ रथ ऋजुरश्मिः सत्यधर्मा मिथुश्चरन्तमुपयाति दूष्यन् ।  
स्तौमि मित्रावरुणा नाथितो जोहवीमि तौ नो मुञ्चतमागसः ।  
वायोस्सवितुर्विदथानि मन्महे यावात्मन्वद्विभृतो यौ च रक्षतः ।  
यौ विश्वस्य परिभू बभूवतुस्तौ नो मुञ्चतमागसः ॥

उपश्रेष्ठा न आशिषो देवयोर्धर्मे अस्थिरन् ।  
स्तौमि वायुꣳ सवितारं नाथितो जोहवीमि तौ नो मुञ्चतमागसः ॥

रथीतमौ रथीनामह्व ऊतये शुभं गमिष्ठौ सुयमेभिरश्वैः ।  
ययोर्वा देवौ देवेष्वनिशितमोजस्तौ नो मुञ्चतमागसः ॥

यदयातं वहतुꣳ सूर्यायास्त्रिचक्रेण सꣳ सदमिच्छमानौ ।  
स्तौमि देवावश्विनौ नाथितो जोहवीमि तौ नो मुञ्चतमागसः ॥

मरुतां मन्वे अधि नो ब्रुवन्तु प्रेमां वाचं विश्वामवन्तु विश्वे ।  
आशून्हुवे सुयमानूतये ते नो मुञ्चत्वेनसः ॥

तिग्ममायुधं वीडितꣳ सहस्वद्विव्यꣳ शर्दः पृतनासु जिष्णु ।  
स्तौमि देवान्मरुतो नाथितो जोहवीमि ते नो मुञ्चत्वेनसः ॥

देवानां मन्वे अधि नो ब्रुवन्तु प्रेमां वाचं विश्वामवन्तु विश्वे ।  
आशून् हुवे सुयमानूतये ते नो मुञ्चत्वेनसः ॥

यदिदं माऽभिषोचति पौरुषेयेण दैव्येन ।  
स्तौमि विश्वान्देवान्नाथितो जोहवीमि ते नो मुञ्चत्वेनसः ॥

अनुनोऽद्यानुमतिर्यज्ञं देवेषु म् अन्यताम् ।  
अग्निश्च हव्यवाहनो भवतांदाशुषे मयः ॥

अन्विदनुमते त्वं मन्यासै शं च नः कृधि ।  
ऋत्वे दक्षाय नो हि नु प्रण आयूँषि तारिषः ॥

वैश्वानरो न ऊत्याऽऽप्र यातु परावतः । अग्निरुक्थेन वाहसा ॥

पृष्टो दिवि पृष्टो अग्निः पृथिव्यां पृष्टो विश्वा ओषदीराविवेश ।  
वैश्वानरसहसा पृष्टो अग्निस्सनो दिवा सारिषः पातु नक्तम् ॥

ये अप्रथेताममितेभिरोजोभिर्ये प्रतिष्ठे अभवतां वसूनाम् ।  
स्तौमि द्यावापृथिवी नाथितो जोहवीमि ते नो मुञ्चतमँहसः ॥

उर्वी रोदसी वरिवः कृणोतं क्षेत्रस्य पत्नी अधि नो ब्रूयतम् ।  
स्तौमि द्यावापृथिवी नाथितो जोहवीमि ते नो मुञ्चतमँहसः ॥

यत् ते वयं पुरुषत्रा यविष्ठायविष्ठा विद्वाँसश्चकृमा कच्चनाऽऽगः ।  
कृधी स्वस्माँ अदितेरनागा व्येनाँसि शिश्रथो विष्वगग्ने ॥

यथाह तद्वसवो गौर्यं चित् पदिषिताममुञ्चता यजत्राः ।  
एवा त्वमस्मत् प्र मुञ्चाव्यँहः प्रातार्यग्ने प्रतरान्न आयुः ॥

॥ सर्पाहुतीः ॥

समीची नामासि प्राचीदित्तस्यास्तेऽग्निरधिपतिरसितो रक्षिता

यश्चादिपतिर्यश्च गोप्ता ताभ्यां नमस्तौ नो मृडयतां

ते यं द्विष्मो यश्च नो द्वेष्टि तं वां जंभे दधामि ।

ओजस्विनी नामासि दक्षिणा दित्तस्यास्त इन्द्रोऽधिपतिः पृदाकू रक्षिता

यश्चादिपतिर्यश्च गोप्ता ताभ्यां नमस्तौ नो मृडयतां

ते यं द्विष्मो यश्च नो द्वेष्टि तं वां जंभे दधामि ।

प्राची नामासि प्रतीची दित्तस्यास्ते सोमोऽधिपतिः स्वजो रक्षिता

यश्चादिपतिर्यश्च गोप्ता ताभ्यां नमस्तौ नो मृडयतां

ते यं द्विष्मो यश्च नो द्वेष्टि तं वां जंभे दधामि ।  
 अवस्थावा नामास्युदीची दिक्तस्यास्ते वरुणोऽधिपतिस्तरश्च राजी रक्षिता  
 यश्चादिपतिर्यश्च गोप्ता ताभ्यां नमस्तौ नो मृडयतां  
 ते यं द्विष्मो यश्च नो द्वेष्टि तं वां जंभे दधामि ।  
 अधिपत्नी नामासि बृहती दिक्तस्यास्ते बृहस्पतिरधिपतिः श्वित्रो रक्षिता  
 यश्चादिपतिर्यश्च गोप्ता ताभ्यां नमस्तौ नो मृडयतां  
 ते यं द्विष्मो यश्च नो द्वेष्टि तं वां जंभे दधामि ।  
 वशिनी नामासीयं दिक्तस्यास्ते यमोऽधिपतिः कल्माषग्रीवो रक्षिता  
 यश्चादिपतिर्यश्च गोप्ता ताभ्यां नमस्तौ नो मृडयतां  
 ते यं द्विष्मो यश्च नो द्वेष्टि तं वां जंभे दधामि ॥  
 ॥ गन्धर्वाहुतीः ॥

हेतयो नामस्थ तेषां वः पुरो गृहा अग्निर्व इषवः सलिलो  
 वातनामं तेभ्यो वो नमस्तेनो मृडयत  
 ते यं द्विष्मो यश्च नो द्वेष्टि तं वो जंभे दधमि ।  
 निलिम्पा नामस्थ तेषां वो दक्षिणा गृहा पितरो वैषवः सगरो  
 वातनामं तेभ्यो वो नमस्तेनो मृडयत  
 ते यं द्विष्मो यश्च नो द्वेष्टि तं वो जंभे दधमि ।  
 वज्रिणो नामस्थ तेषां वः पश्चाद्गृहा स्वप्नोव इषवो गह्वरो  
 वातनामं तेभ्यो वो नमस्तेनो मृडयत  
 ते यं द्विष्मो यश्च नो द्वेष्टि तं वो जंभे दधमि ।  
 अवस्थावानो नामस्थ तेषां व उत्तरद्गृहा आपोव इषवः समुद्रो  
 वातनामं तेभ्यो वो नमस्तेनो मृडयत  
 ते यं द्विष्मो यश्च नो द्वेष्टि तं वो जंभे दधमि ।  
 अधिपतयो नामस्थ तेषां व उपरि गृहा वर्षं व इषवोऽवस्वान्  
 वातनामं तेभ्यो वो नमस्तेनो मृडयत  
 ते यं द्विष्मो यश्च नो द्वेष्टि तं वो जंभे दधमि ।  
 ऋव्या नामस्थ पार्थिवातेषां व इह गृहा अन्नं व इषवोऽनिमिषो  
 वातनामं तेभ्यो वो नमस्तेनो मृडयत  
 ते यं द्विष्मो यश्च नो द्वेष्टि तं वो जंभे दधमि ।  
 ॥ अज्यानि ॥

शतायुधाय शतवीर्याय शतोतयेऽभिमातिषाहे ।

शतं यो नः शरदो अजीतानिन्द्रो नेषदति दुरितानि विश्वा ॥

ये चत्वारः पथयो देवयाना अंतरा द्यावापृथिवी वियन्ति ।

तेषां यो अज्यानि मजीति माहवात्तस्मै नो देवाः परिदत्तेह सर्वे ॥

ग्रीष्मो हेमन्त उतनो वसन्तः शरद्वर्षाः सुवितन्नो अस्तु ।

तेषामृतूनां ५ शतशारदानां निवात एषामभये स्याम ॥

इदुवत्सराय परिवत्सराय संवत्सराय कृणुता बृहन्नमः ।

तेषां वयं ५ सुमतौ यज्ञियानां ज्योगजीता अहताः स्याम ॥

भद्रान्नः श्रेयः समनैष्ट देवास्त्वयाऽवसेन समशीमहि त्वा ।

स नो मयोभूः पितो आविशस्व शन्तोकाय तनुवे स्यो नः ॥

भूतं भव्यं भविष्यद्वषद्वाहा नम ऋक्सामयजुर्वषद्वाहा नमो

गायत्रीत्रिष्टुप्जगतीवषद्वाहा नमः पृथिव्यन्तरिक्षम् द्यौर्वषद्वाहा

नमोऽग्निर्वायुः सूर्यो वषद्वाहा नमः प्राणो व्यानोऽपानो वषद्वाहा

नमोऽन्नं कृषिर्वृष्टिर्वषद्वाहा नमः पिता पुत्रः पौत्रो वषद्वाहा नमो

भूर्भुवः सुवर्वषद्वाहा नमः ।

॥ अथर्वशिरसम् ॥

इन्द्रोदधीचो अस्थभिः । वृत्राण्यप्रतिष्कृतः । जघान नवतीर्नव ।

इच्छन्नश्वस्य यच्छिरः । पर्वतेष्वपश्रितम् । तद्विदच्छिर्यणावति ।

अत्राह गोरमन्वत । नाम त्वष्टुरपीच्यम् । इत्थ चन्द्रमसो गृहे ।

इन्द्रमिद्राथिनो बृहत् । इन्द्रमर्केभिरर्किणः । इन्द्रं वानीरनूपत ।

इन्द्र इद्धर्योः सचा । संमिश्र आवचो युजा । इन्द्रो वज्रीहिरण्ययः ।

इन्द्रो दीर्घाय चक्षसे । आसूर्यं ५ रोहयद्विवि । विगोभिरद्रिमैरयत् ।

इन्द्र वाजेषु नो अव । सहस्रप्रधनेषु च । उग्र उग्राभिरूतिभिः ।

तमिन्द्रं वाजयामसि । महे वृत्राय हन्तवे । सा वृषा वृषभोऽभुवत् ।

इन्द्रः स दामने कृतः । ओजिष्ठः सबलेहितः । द्युम्नी श्लोकी ससौम्यः ।

गिरा वज्रो न संभृतः । सबलो अनपच्युतः । ववक्षुरुग्रो अस्तृतः ।

॥ प्रत्यंगिरसम् ॥

चक्षुषो हेते मनसो हेते । वाचोहेते ब्रह्मणो हेते ।

योमाऽघायुरभिदासति । तमग्ने मेन्याऽमेनिं कृणु ।

यो मा चक्षुषा यो मनस । यो वाचा ब्रह्मणाघायुरभिदासति ।

तथाऽग्ने त्वं मेन्या । अमुममेनिं कृणु ।  
 यत्किञ्चासौ मनसा यच्च वाचा । यज्ञैर्जुहोति यजुष हविर्भिः ।  
 तन्मृत्युर्निर्ऋत्या संविदानः । पुरादिष्टादाहुतीरस्य हन्तु ।  
 यातुधाना निर्ऋतिरादु रक्षः । ते अस्यघ्नन्त्वन्वृतेन सत्यम् ।  
 इन्द्रेषिता आज्यमस्य मध्नन्तु । मा तत्समृद्धिं यदसौ करोति ।  
 हन्मि तेऽहं कृतं हविः । यो मे घोरमचीकृतः ।  
 अपां चौत उभौ बाहू । अपनह्याम्यास्यम् ।  
 अपनह्यामि ते बाहू । अपनह्याम्यास्यम् ।  
 अग्नेर्देवस्य ब्रह्मणा । सर्वं तेऽवधिषंकृतम् ।  
 पुराऽमुष्य वषट्कारात् । यज्ञं देवेषु नस्कृधि ।  
 स्विष्टमस्माकं भ्यूयात् । माऽस्मान् प्रापन्नरातयः ।  
 अन्तिदूरे सतो अग्ने । भ्रातृव्यस्याभिदासतः ।  
 वषट्कारेण वज्रेण । कृत्यां हन्मि कृतामहम् ।  
 यो मा नक्तं दिवा सायम् । प्रातश्चाहो निपीयति ।  
 अद्यातमिन्द्र वज्रेण । भ्रातृव्यं पादयामसि ।  
 प्राणो रक्षति विश्वमेजत् । इर्यो भूत्वा बहुदा बहूनि ।  
 स इत्सर्वं व्यानशे । यो देवो देवेषु विभूरन्तः ।  
 आवृद्दात् क्षेत्रियध्वगद्वृषा । तमित्प्राणं मनसोपशिक्षत ।  
 अग्रं देवानामिदमत्तु नो हविः । मनसश्चित्तेदम् ।  
 भूतं भव्यं च गुप्यते । तद्धिदेवेष्वग्नियम् ।  
 आ न एतुपुरश्चरम् । सह देवैरिमं हवम् ।  
 मनः श्रेयसि श्रेयसि । कर्मन्यज्ञपतिं दधत् ।  
 जुषतां मे वागिदं हविः । विराड् देवी पुरोहिता ।  
 हव्यवाडनपायिनी । यया रूपाणि बहुदा वदन्ति ।  
 पेशांसि देवाः परमे जनित्रे । सा नो विराडनपस्फुरन्ति ।  
 वाग्देवी जुषतामिदं हविः । चक्षुर्देवानां ज्योतिरमृते न्यक्तम् ।  
 अस्य विज्ञानाय बहुधा निधीयते । तस्य सुम्रमशीमहि ।  
 मा नो हासीद्विचक्षणम् । आयुरिन्नः प्रतीर्यताम् ।  
 अनन्याश्चक्षुषावयम् । जीवा ज्योतिरशीमहि ।  
 सुवज्योतिरुतामृतम् । श्रोत्रेण भद्रमुत शृण्वन्ति सत्यम् ।  
 श्रोत्रेण वाचं बहुधोद्यमानाम् । श्रोत्रेण मोदश्च महश्च श्रूयते ।  
 श्रोत्रेण सर्वा दिश आशृणोमि । येन प्राच्या उत दक्षिणा ।

प्रतीच्यैदिशः शृण्वन्त्युत्तरात् । तदिच्छ्रोत्रं बहुधोद्यमानम् ।  
अरान्ननेमिः परिसर्वं बभूव ।

सि० हे व्याघ्र उत या पृदाकौ । त्विषिरग्नौ ब्राह्मणे सूर्येया ।  
इन्द्रं या देवी सुभगा जजान । सा न आगन्वर्चसा संविदाना ।  
या राजन्ये दुन्दुभावायतायाम् । अश्वस्य क्रन्देपुरुषस्य मायौ ।  
इन्द्रं या देवी सुभगा जजान । सा न आगन्वर्चसा संविदाना ।  
या हस्तिनि द्वीपिनि या हिरण्ये । त्विषिरश्वेषु पुरुषेषु गोषु ।  
इन्द्रं या देवी सुभगा जजान । सा न आगन्वर्चसा संविदाना ।  
रथेअक्षेषु वृषभस्य वजे । वाते पर्जन्ये वरुणस्य शुष्मे ।  
इन्द्रं या देवी सुभगा जजान । सा न आगन्वर्चसा संविदाना ।  
राडसि विराडसि । सम्राडसि स्वराडसि ।  
इन्द्राय त्वा तेजस्वते तेजस्वन्तं० श्रीणामि ।  
इन्द्राय त्वौजस्वत ओजस्वन्तं० श्रीणामि ।  
इन्द्राय त्वा पयस्वते पयस्वन्तं० श्रीणामि ।  
इन्द्राय त्वाऽऽयुष्मत आयुष्मन्तं० श्रीणामि ।  
तेजोऽसि । तत्ते प्रयच्छामि । तेजस्वदस्तु मे मुखम् ।  
तेजस्वच्छिरो अस्तु मे । तेजस्वान् विश्वतः प्रत्यङ् ।  
तेजसा सम्पिपृग्धि मा ।  
ओजोऽसि । तत्ते प्रयच्छामि । ओजस्वदस्तु मे मुखम् ।  
ओजस्वच्छिरो अस्तु मे । ओजस्वान् विश्वतः प्रत्यङ् ।  
ओजसा सम्पिपृग्धि मा ।  
पयोऽसि । तत्ते प्रयच्छामि । पयस्वदस्तु मे मुखम् ।  
पयस्वच्छिरो अस्तु मे । पयस्वान् विश्वतः प्रत्यङ् ।  
पयसा सम्पिपृग्धि मा ।  
आयुरसि । तत्ते प्रयच्छामि । आयुष्मदस्तु मे मुखम् ।  
आयुष्मच्छिरो अस्तु मे । आयुष्मान् विश्वतः प्रत्यङ् ।  
आयुषा सम्पिपृग्धि मा ।  
इममग्न आयुषे वर्चसे कृधि । प्रियं०रेतो वरुण सोम राजन् ।  
मातेवास्मा अदिते शर्म यच्छ । विश्वेदेवा जरदष्टिर्यथाऽसत् ।  
आयुरसि विश्वायुरसि । सर्वायुरसि सर्वमायुरसि ।  
यतो वातो मनोजवाः । यतः क्षरन्ति सिन्धवः ।

तासान्त्वा सर्वासाँ रुचा । अभिषिंचामि वर्चसा ।  
 समुद्र इवासि गह्वना । सोम इवास्यदाभ्यः ।  
 अग्निरिव विश्वतः प्रत्यङ् । सूर्य इव ज्योतिषा विभूः ।  
 अपां यो द्रवणे रसः । तमहमस्मा आमुष्यायणाय ।  
 तेजसे ब्रह्मवर्चसाय गृह्णामि ।  
 अपां यो ऊर्मौ रसः । तमहमस्मा आमुष्यायणाय ।  
 ओजसे वीर्याय गृह्णामि ।  
 अपां यो मध्यतो रसः । तमहमस्मा आमुष्यायणाय ।  
 पुष्टे प्रजननाय गृह्णामि ।  
 अपां यो यज्ञियो रसः । तमहमस्मा आमुष्यायणाय ।  
 आयुषे दीर्घायुत्वाय गृह्णामि ।  
 अहमस्मि प्रथमजा ऋतस्य । पूर्वं देवेभ्यो अमृतस्य नाभिः ।  
 यो मा ददाति स इदेव मा वाः । अहमन्नमन्नमदन्तमग्नि ।  
 पूर्वमग्नेरपि दहत्यन्नं । यत्तो हासाते अहमुत्तरेषु ।  
 व्यात्तमस्य पशवस्सुजम्भम् । पश्यन्ति धीरा प्रचरन्ति पाकाः ।  
 जहाम्यन्यन्नजहाम्यन्यम् । अहमन्नं वशमिच्चरामि ।  
 समानमर्थं पर्येमि भुञ्जत् । को मामन्नं मनुष्यो दयेत ।  
 पराके अन्नं निहितं लोक एतत् । विश्वैर्देवैः पितृभिर्गुप्तमन्नम् ।  
 यदद्यते लुप्यते यत्परोष्यते । शततमी सा तनूर्मे बभूव ।  
 महान्तौ चरु सकृद्गुधेन पप्रौ । दिवंच पृश्नि पृथिवीं च साकम् ।  
 तत्सम्पिबन्तो न मिनन्ति वेधसः । नैतद्भूयो भवति नो कनीयः ।  
 अन्नं प्राणमन्नमपानमाहुः । अन्नं मृत्युं तमु जीवातुमाहुः ।  
 अन्नं ब्रह्माणो जरसं वदन्ति । अन्नमाहुः प्रजननं प्रजानाम् ।  
 मोघमन्नं विन्दते अप्रचेताः । सत्यं ब्रवीमि वध इत्स तस्य ।  
 नार्यमणं पुष्यति नो सखायम् । केवलाघो भवति केवलादि ।  
 अहं मेघस्तनयन्वर्षन्नस्मि । मामदन्त्यहमद्यन्यान् ।  
 अहँ सदमृतो भवामि । मदादित्या अधि सर्वे तपन्ति ।  
 देवीं वाचमजनयन्त देवाः । तां विश्वरूपाः पशवो वदन्ति ।  
 सा नो मन्ध्रेषमूर्जं दुहाना । धेनुर्वागस्मानुपसुष्टुतैतु ।  
 यद्वाग्वदन्त्यविचेतनानि । राष्ट्री देवानान्निषसादमन्द्रा ।  
 चतस्र ऊर्जदुदुहे पयाँ सिक्कस्विदस्याः परमं जगाम ।  
 अनन्तामन्तादधि निर्मितां महीम् । यस्यां देवा अदधुर्भोजनानि ।

एकाक्षरमां द्विपदां षत्पदाश्च । वाचं देवा उपजीवन्ति विश्वे ।  
 वाचं देवा उपजीवन्ति विश्वे । वाचं गन्धर्वाः पशवो मनुष्याः ।  
 वाचीमाविश्वा भुवनान्यर्पिता । सा नो हवं जुषतामिन्द्रपत्नी ।  
 वागक्षरं प्रथमजा ऋतस्य । वेदानां माताऽमृतस्य नाभिः ।  
 सानो जुषाणोप यज्ञमागात् । अवन्ती देवी सुहवामे अस्तु ।  
 यामृषयो मन्त्रकृतो मनीषिणः । अन्वैच्छन्देवास्तपसा श्रेमेण ।  
 तां देवीं वाचं हविषा यजामहे । सा नो दधातु सुकृतस्य लोके ।  
 चत्वारि वाक्परिमिता पदानि । तानि विदुर्ब्राह्मणा ये मनीषिणः ।  
 गुहा त्रीणि निहिता नेंगयन्ति । तुरीयं वाचो मनुष्या वदन्ति ।  
 श्रद्धयाग्निः समिध्यते । श्रद्धया विन्दते हविः ।  
 श्रद्धां भगस्य मूर्धनि।वचया वेदयामसि ।  
 प्रियं श्रद्धे ददतः । प्रियं श्रद्धे दिदासतः ।  
 प्रियं भोजेषु यज्वसु । इदं म उदितं कृधि ।  
 यथा देवा असुरेषु । श्रद्धामुग्रेषु चक्रिरे ।  
 एवं भोजेषु यज्वसु । अस्माकमुदितं कृधि ।  
 श्रद्धं देवा यजमानाः । वायुगोपा उपासते ।  
 श्रद्धां हृदय्ययाऽऽकूत्या । श्रद्धया हूयते हविः ।  
 श्रद्धां प्रातर्हवामहे । श्रद्धां मध्यंदिनं परि ।  
 श्रद्धां सूर्यस्य निमृचि । श्रद्धे श्रद्धापयेह मा ।  
 श्रद्धा देवानधिवस्ते । श्रद्ध विश्वमिदं जगत् ।  
 श्रद्धां कामस्य मातरम् । हविष वर्धयामसि ।  
 ब्रह्मजज्ञानं प्रथमं पुरस्तात् । विसीमतस्सुरुचो वेन आवः ।  
 स बुध्निया उपमा अस्य विष्ठाः । सतश्च योनिमसतश्च विवः ।  
 पिता विराजामृषभो रयीणाम् । अन्तरिक्षं विश्वरूप आविवेश ।  
 तमर्कैरभ्यर्चन्ति वत्सम् । ब्रह्म सन्तं ब्रह्मणा वर्धयन्तः ।  
 ब्रह्म देवानजनयत् । ब्रह्म विश्वमिदं जगत् ।  
 ब्रह्मणः क्षत्रन्निर्मितम् । ब्रह्म ब्राह्मण आत्मना ।  
 अन्तरस्मिन्नेमे लोकाः । अन्तर्विश्वमिदं जगत् ।  
 ब्रह्मैव भूतानां ज्येष्ठम् । तेन कोऽर्हति स्पर्धितुम् ।  
 ब्रह्मन्देवास्त्रयस्त्रिंशत् । ब्रह्मन्निन्द्रप्रजापती ।  
 ब्रह्मन् ह विश्वा भूतानि । नावीवान्तः समाहिता ।  
 चतस्र आशाः प्रचरन्त्वग्नयः । इमं नो यज्ञं नयतु प्रजानम् ।

घृतं पिन्वन्नजरं सुवीरम् । ब्रह्मसमिद्भवत्याहुतीनाम् ।  
आगावो अगमन्नुत भद्रमक्रन् । सीदन्तु गोष्ठेरणयन्त्वस्मे ।  
प्रजावतीः पुरुरूपा इह स्युः । इन्द्राय पूर्वीरुषसो दुहानाः ।  
इन्द्रो यज्वने पृणते चशिक्षति । उपहृदाति न स्वं मुषायति ।  
भूयो भूयो रथिमिदस्य वर्धयन् । अभिन्ने खिल्ले निदधाति देवयुम् ।  
न ता नशन्ति न दभाति तस्करः । नैना अमित्रो व्यथिरदधर्षति ।  
देवाश्च याभिर्यजते ददाति च । ज्योगित्ताभिस्सचते गोपतिः सह ।  
न ता अर्वा रेणुक कातो अश्रुते । न सस्कृतत्रपुपयन्ति ता अभि ।  
उरुगायमभयन्तस्य ता अनु । गावो मर्त्यस्य विचिरन्ति यज्वनः ।  
गावो भगो गाव इन्द्रो मे अच्छात् । गावः सोमस्य प्रथमस्य भक्षः ।  
इमा यागावस्सजना स इन्द्रः । इच्छामीद्धृदा मनसा चिदिन्द्रम् ।  
यूयं गावो मेदयथा कृशंचित् । अश्लीलं चित्कृणुथा सुप्रतीकम् ।  
भद्रं गृहं कृणुथ भद्रवाचः । बृहद्वो वय उच्यते सभासु ।  
प्रजावतीः सूयवसंरिशन्तीः । शुद्धा अपस्सु प्रपाणे पिबन्तीः ।  
मावस्तेन इशत माघशंसः । परिवोहेती रुद्रस्य वृज्यात् ।  
उपेदमुपपर्वनम् । आसु गोषूप पृच्यताम् ।  
उपषभस्य रेतसि । उपेन्द्र तव वीर्ये ।  
ता सूर्याचन्द्रमसा विश्वभृत्तमामहत् ।  
तेजो वसु मद्राजतो दिवि । सामात्मानाचरतस्साम चारिणा ।  
ययोर्ब्रतन्नममे जातुदेवयोः । उभावन्तौ परियात अमर्या ।  
दिवो नरश्मीस्तनुतोव्यर्णवे । उभा भुवन्तीभुवना कविक्रतू ।  
सूर्या न चन्द्रा चरतो हतामती । पतीद्युमद्विश्वविदा उभा दिवः ।  
सूर्या उभा चन्द्रमसा विचक्षणा । विश्ववारा वरिवो भावरेण्या ।  
ता नोऽवतं मतिमन्ता महिब्रता । विश्व वपरे प्रतरणा तरन्ता ।  
सुवर्विदा दृशये भूरि रश्मी । सूर्या हि चन्द्रा वसुत्वेष दर्शता ।  
मनस्विनो भाऽनुचरतोनुसंदिवम् । अस्य श्रवो नद्यः सप्त बिभ्रति ।  
द्यावाक्षामा पृथिवी दर्शतं वपुः । अस्मे सूर्या चन्द्रमसाऽभिचक्षे ।  
श्रद्धेकमिन्द्र चरतो विचर्तुरम् । पुर्वापरंचरतोमाययैतौ ।  
शिशू क्रीडन्तौ परियातो अध्वरम् । विश्वान्यन्यो भुवनाऽभिचष्टे ।  
ऋतूनन्यो विदधञ्जायते पुनः ।  
हिरण्यवर्णाः शुचयः पावका यासु जातः कश्यपो यास्विन्द्रः ।

अग्निं या गर्भम् दधिरे विरूपास्तान आपश्शꣳ स्योना भवन्तु ॥  
 यासाꣳ राजा वरुणो याति मध्ये सत्यानृते अवपश्यम् जनानाम् ।  
 मधुश्चुतश्शुचयो याः पावकास्ता न आपश्शꣳ स्योना भवन्तु ॥  
 यासाम् देवा दिवि कृण्वन्ति भक्षं या अन्तरिक्षे बहुधा भवन्ति ।  
 याः पृथिवीम् पयसोन्दन्ति शुक्रास्ता न आपश्शꣳ स्योना भवन्तु ॥  
 शिवेन मा चक्षुषा पश्यतापश्शिवया तनुवोप स्पृशत त्वचम् मे ।  
 सर्वाꣳ अग्नीꣳ रप्सुषदो हुवे वो मयि वर्चो बलमोजो निधत्त ॥  
 आपोभद्रा गृतमिदाप आसुरग्रीषोमौ बिभ्रात्याप इत्ताः ।  
 तीव्रो रसो मधुपृचामरंगम आ मा प्राणेन सह वर्च सागन् ॥  
 आदित्पश्याम्युत वा शृणोम्यामा घोषो गच्छति वाङ् न आसाम् ।  
 मन्येभेजानो अमृतस्य तर्हि हिरण्यवर्णा अतृपं यदावः ॥  
 नासदासीन्नो सदासीत्तदानीम् । नासीद्रजो नो व्योमा परो यत् ।  
 किमावरिवः कुह कस्य शर्मन् । अम्भः किमासीद्गहनं गभीरम् ।  
 न मृत्युरमृतं तर्हि न । रात्रिया अह्ना आसीत् प्रकेतः ।  
 आनीदवातꣳ स्वधया तदेकम् । तस्माद्धान्यं न परः किंचनास ।  
 तम आसीत्तमसा गूढमग्रे प्रकेतम् । सलिलꣳ सर्व मा इदम् ।  
 तुच्छेनाभवपि हितं यदासीत् । तमसस्तन्महिना जायतैकम् ।  
 कामस्तदग्रे समवर्तताधि । मनसो रेतः प्रथमं यदासीत् ।  
 स तो बन्धुमसति निरविन्दन् । हृदिप्रतीष्या कवयो मनीषा ।  
 तिरश्चीनो विततो रश्मिरेषाम् । अधस्विदासी ३ दुपरिस्विदासी ३ त् ।  
 रेतोधा आसन्महिमा न आसन् । स्वधा अवस्तात् प्रयतिः परस्तात् ।  
 को अद्धा वेद क इह प्रवोचत् । कुत आ जाता कुत इयं विसृष्टिः ।  
 अर्वाग्देवा अस्य विसर्जनाय । अथा को वेदयत आ बभूव ।  
 इयं विसृष्टिर्यत आबभूव । यदि वा दधे यदि वा न ।  
 यो अस्याध्यक्षः परमे व्योमन् । सो अंग वेद यदि वा न वेद ।  
 किꣳस्विद्वनं क उ स वृक्ष आसीत् । यतो द्यावापृथिवी निष्टतक्षुः ।  
 मनीषिणो मनसापृच्छते द्रुतत् । यदध्यतिष्ठद्भुवनानि धारयन् ।  
 ब्रह्म वनं ब्रह्म सवृक्ष आसीत् । यत्तो द्यावापृथिवी निष्टतक्षुः ।  
 मनीषिणो मनसा विब्रवीमि वः । ब्रह्माध्यतिष्ठद्भुवनानि धारयन् ।  
 प्रातरग्निं प्रातरिन्द्रꣳ हवामहे । प्रातर्मित्रावरुणा प्रातरश्विना ।

प्रातर्भगं पूषणं ब्रह्मणस्पतिम् । प्रातः सोममुत रुद्रं हुवेम ।  
 प्रातर्जितं भगमुग्रं हुवेम । वयं पुत्रमदितेर्यो विधर्ता ।  
 आघ्रश्चिद्यं मन्यमानस्तुरश्चित् । राजाचिद्यं भगं भक्षीत्याह ।  
 भग प्रणेतर्भग सत्यराधः । भगेमां धियमुदवददन्नः ।  
 भग प्रणो जनय गोभिरश्वैः । भग प्रनृभिर्नृवन्तः स्याम ।  
 उतेदानीं भगवन्तः स्याम । उत प्रपित्व उत मध्य अह्नाम् ।  
 उतोदिता मघवन्त्सूर्यस्य । वयं देवानां सुमतौ स्याम ।  
 भग एव भगवा अस्तु देवाः । तेन वयं भगवन्तः स्याम ।  
 तन्त्वा भग सर्वं इज्जोहवीमि । सनो भग पुर एता भवेह ।  
 समध्वरायोषसोनमन्त । दधिक्रावेव शुचये पदाय ।  
 अर्वाचीनं वसुविदं भगन्नः । रथमिवाश्वा वाजिन आवहन्तु ।  
 अश्ववतीर्गोमतीर्न उषासः । वीरवतीः सदमुच्छन्तु भद्राः ।  
 घृतं दुहाना विश्वतः प्रपीनाः । यूयं पात स्वस्तिभिः सदा नः ।  
 अग्निर्नः पातु कृत्तिकाः । नक्षत्रं देवमिन्द्रियम् ।  
 इदमासां विचक्षणम् । हविरासं जुहोतन ।  
 यस्य भान्ति रश्मयो यस्य केतवः । यस्येमा विश्वा भुवनानि सर्वा ।  
 स कृत्तिकाभिरभिसंवसानः । अग्निर्नो देवस्सुविते दधातु ॥  
 प्रजापते रोहिणीवेतु पत्नी । विश्वरूपा बृहती चित्रभानुः ।  
 सा नो यज्ञस्य सुविते दधातु । यथा जीवेम शरदस्सवीराः ।  
 रोहिणी देव्युदगात्पुरस्तात् । विश्वा रूपणि प्रतिमोदमाना ।  
 प्रजापतिं हविषा वर्धयन्ती । प्रिया देवानामुपयातु यज्ञम् ॥  
 सोमो राजा मृगशीर्षेण आगन् । शिवं नक्षत्रं प्रियमस्य धाम ।  
 आप्यायमानो बहुधा जनेषु । रेतः प्रजां यजमाने दधातु ।  
 यत्ते नक्षत्रं मृगशीर्षमस्ति । प्रियं राजन् प्रियतमं प्रियाणाम् ।  
 तस्मै ते सोम हविषा विधेम । शन्न एधि द्विपदे शं चतुष्पदे ॥  
 आर्द्रया रुद्रः प्रथमा न एति । श्रेष्ठो देवानां पतिरघ्नियानाम् ।  
 नक्षत्रमस्य हविषा विधेम । मा नः प्रजां रीरिषन्मोत वीरान् ।  
 हेति रुद्रस्य परिणो वृणक्तु । आर्द्रा नक्षत्रं जुषता हविर्नः ।  
 प्रमुञ्चमानौ दुरितानि विश्वा । अपाघशं सन्नृदतामरातिम् ॥  
 पुनर्नो देव्यदितिस्पृणोतु । पुनर्वसूनः पुनरेतां यज्ञम् ।

पुनर्नो देवा अभियन्तु सर्वे । पुनः पुनर्वो हविषा यजामः ।  
एवा न देव्यदितिरनर्वा । विश्वस्य भर्त्री जगतः प्रतिष्ठा ।  
पुनर्वसू हविषा वर्धयन्ती । प्रियम् देवानामप्येतु पाथः ॥

बृहस्पतिः प्रथमं जायमानः । तिष्यम् नक्षत्रमभि संबभूव ।  
श्रेष्ठो देवानां पृतनासुजिष्णुः । दिशोऽनु सर्वा अभयन्नो अस्तु ।  
तिष्यः पुरस्तादुत मध्यतो नः । बृहस्पतिर्नः परिपातु पश्चात् ।  
बाधेतान्द्वेषो अभयं कृणुताम् । सुवीर्यस्य पतयस्याम ॥

इदं सर्पेभ्यो हविरस्तु जुष्टम् । आश्रेषा येषामनुयन्ति चेतः ।  
ये अन्तरिक्षं पृथिवीं क्षियन्ति । ते नस्सर्पासो हवमागमिष्ठाः ।  
ये रोचने सूर्यस्यापि सर्पाः । ये दिवं देवीमनुसञ्चरन्ति ।  
येषामश्रेषा अनुयन्ति कामम् । तेभ्यस्सर्पेभ्यो मधुमञ्जुहोमि ॥

उपहृताः पितरो ये मघासु । मनोजवसस्सुकृतस्सुकृत्याः ।  
ते नो नक्षत्रे हवमागमिष्ठाः । स्वधाबिर्यज्ञं प्रयतं जुषन्ताम् ।  
ये अग्निदग्धा येऽनग्निदग्धाः । येऽमुल्लोकं पितरः क्षियन्ति ।  
याँश्च विद्वयाँ उ च न प्रविद्ध । मघासु यज्ञं सुकृतम् जुषन्ताम् ॥

गवां पतिः फल्गुनीनामसि त्वम् । तदर्यमन् वरुणमित्र चारु ।  
तं त्वा वयं सनितारं सनीनाम् । जीवा जीवन्तमुप संविशेम ।  
येनेमा विश्वा भुवनानि सञ्जिता । यस्य देवा अनुसंयन्ति चेतः ।  
अर्यमा राजाऽजरस्तु विष्मान् । फल्गुनीनामृषभो रोरवीति ॥

श्रेष्ठो देवानाम् भगवो भगासि । तत्त्वा विधुः फल्गुनीस्तस्य वित्तात् ।  
अस्मभ्यं क्षत्रमजरं सुवीर्यम् । गोमदश्ववदुपसन्नदेह ।  
भगोह दाता भग इत्प्रदाता । भगो देवीः फल्गुनीराविवेश ।  
भगस्येत्तं प्रसवं गमेम । यत्र देवैस्सधमादं मदेम ॥

आयातु देवस्सवितोपयातु । हिरण्ययेन सुवृता रथेन ।  
वहन् हस्तं सुभं विद्वानापसम् । प्रयच्छन्तं पपुरिं पुण्यमच्छ ।  
हस्तः प्रयच्छ त्वमृतं वसीयः । दक्षिणेन प्रतिगृष्णीम एनत् ।  
दातारमद्य सविता विदेय । यो नो हस्ताय प्रसुवाति यज्ञम् ॥

त्वष्टा नक्षत्रमध्येति चित्राम् । सुभं ससंयुवति रोचमानाम् ।  
निवेशयन्नमृतात्मर्त्याँश्च । रूपाणि पिँशन् भुवनानि विश्वा ।

तन्नस्त्वष्टा तदु चित्रा विचष्टाम् । तन्नक्षत्रं भूरिदा अस्तु मह्यम् ।  
तन्नः प्रजां वीरवतीं सनोतु । गोभिर्नो अश्वैस्समनक्तु यज्ञम् ॥

वायुर्नक्षत्रमभ्येति निष्ठाम् । तिग्मशृंगो वृषभो रोरुवाणः ।  
समीरयन् भुवना मातरिश्वा । अप द्वेषांसि नुदतामरातीः ।  
तन्नो वायस्तदु निष्ठ्या शृणोतु । तन्नक्षत्रं भूरिदा अस्तु मह्यम् ।  
तन्नो देवासो अनुजानन्तु कामम् । यथा तरेम दुरितानि विश्वा ॥

दूरमस्मच्छत्रवो यन्तु भीताः । तदिन्द्राग्नी कृणुताम् तद्विशिखे ।  
तन्नो देवा अनुमदन्तु यज्ञम् । पश्चात् पुरस्तादभयन्नो अस्तु ।  
नक्षत्राणामधिपत्नी विशाखे । श्रेष्ठाविन्द्राग्नी भुवनस्य गोपौ ।  
विषूचशत्रूनपबाधमानौ । अपक्षुधन्नुदतामरातिम् ॥

पूर्णा पश्चादुत पूर्णा पुरस्तात् । उन्मध्यतः पौर्णमासी जिगाय ।  
तस्यां देवा अधिसंवसन्तः । उत्तमे नाक इह मादयन्ताम् ।  
पृथ्वी सुवर्चा युवतिः सजोषाः । पौर्णमास्युदगाच्छोभमाना ।  
आप्याययन्ती दुरितानि विश्वा । उरुं दुहां यजमानाय यज्ञम् ।  
ऋद्ध्यास्म हव्यैर्नमसोपसद्य । मित्रं देवं मित्रधेयं नो अस्तु ।  
अनूराधान् हविषा वर्धयन्तः । शतं जीवेम शरदः सवीराः ।  
चित्रम् नक्षत्रमुदगात्पुरस्तात् । अनूराधा स इति यद्वदन्ति ।  
तन्मित्र एति पथिभिर्देवयानैः । हिरण्ययैर्विततैरन्तरिक्षे ॥

इन्द्रो ज्येष्ठामनु नक्षत्रमेति । यस्मिन् वृत्रं वृत्र तूर्यो ततार ।  
तस्मिन्वयममृतं दुहानाः । क्षुधन्तरेम दुरितिं दुरिष्टिम् ।  
पुरन्दराय वृषभाय धृष्णवे । अषाढाय सहमानाय मीढुषे ।  
इन्द्राय ज्येष्ठा मधुमद्दुहानाः । उरुं कृणोतु यजमानाय लोकम् ॥

मूलं प्रजां वीरवतीं विदेय । पराच्येतु निर्ऋतिः पराचा ।  
गोभिर्नक्षत्रं पशुभिस्समक्तम् । अहर्भूयाद्यजमानाय मह्यम् ।  
अहर्नो अद्य सुविते ददातु । मूलं नक्षत्रमिति यद्वदन्ति ।  
पराचीं वाचा निर्ऋतिं नुदामि । शिवं प्रजयै शिवमस्तु मह्यम् ॥

या दिव्या आपः पयसा सम्बभूवुः । या अन्तरिक्ष उत पार्थिवीर्याः ।  
यासामषाढा अनुयन्ति कामम् । ता न आपः शस्योना भवन्तु ।  
याश्च कूप्या याश्च नाद्यास्समुद्रियाः । याश्च वैशन्तीरुत प्रासचीर्याः ।  
यासामषाढा मधु भक्षयन्ति । ता न आपः शस्योना भवन्तु ॥

तन्नो विश्वे उप शृण्वन्तु देवाः । तदषाढा अभिसंयन्तु यज्ञम् ।  
तन्नक्षत्रं प्रथतां पशुभ्यः । कृषिर्वृष्टिर्यजमानाय कल्पताम् ।  
शुभ्राः कन्या युवतयस्सुपेशसः । कर्मकृतस्सुकृतो वीर्यावतीः ।  
विश्वान् देवान् हविषा वर्धयन्तीः । अषाढाः काममुपायन्तु यज्ञम् ॥  
यस्मिन् ब्रह्माऽभ्यजयत्सर्वमेतत् । अमुञ्च लोकमिदमूच सर्वम् ।  
तन्नो नक्षत्रमभिजिद्विजित्य । श्रियं दधात्वह्णीयमानम् ।  
उभौ लोकौ ब्रह्मणा सञ्जितेभौ । तन्नो नक्षत्रमभिजिद्विचष्टाम् ।  
तस्मिन्वयं पृतनास्सञ्जयेम । तन्नो देवासो अनुजानन्तु कामम् ॥  
शृण्वन्ति श्रोणाममृतस्य गोपाम् । पुण्यामस्या उपशृणोमि वाचम् ।  
महीं देवीं विष्णुपत्नीमजूर्याम् । प्रतीची मेना हविषा यजामः ।  
त्रेधा विष्णुरुगायो विचक्रमे । महीं दिवं पृथिवीमन्तरिक्षम् ।  
तच्छ्रोणैतिश्रव इच्छमाना । पुण्यं श्लोकं यजमानाय कृण्वती ॥  
अष्टौ देवा वसवस्सोम्यासः । चतस्रो देवीरजराः श्रविष्ठाः ।  
ते यज्ञं पान्तु रजसः पुरस्तात् । संवत्सरीणममृतं स्वस्ति ।  
यज्ञं नः पान्तु वसवः पुरस्तात् । दक्षिणतोऽभियन्तु श्रविष्ठाः ।  
पुण्यन्नक्षत्रमभि संविशाम । मा नो अरातिरघशं साऽगन् ॥  
क्षत्रस्य राजा वरुणोऽधिराजः । नक्षत्राणां शतभिषग्वसिष्ठः ।  
तौ देवेभ्यः कृणुति दीर्घमायुः । शतं सहस्रा भेषजानि धत्तः ।  
यज्ञन्नो राजा वरुण उपयातु । तन्नो विश्वे अभि संयन्तु देवाः ।  
तन्नो नक्षत्रं शतभिषगजुषाणम् । दीर्घमायुः प्रतिरद्धेषजानि ॥  
अज एकपादुदगात्पुरस्तात् । विश्वा भूतानि प्रति मोदमानः ।  
तस्य देवाः प्रसवं यन्ति सर्वे । प्रोष्ठपदासो अमृतस्य गोपाः ।  
विभ्राजमानस्समिधा न उग्रः । आऽन्तरिक्षमरुहदगन्द्याम् ।  
तं सूर्यं देवमजमेकपादम् । प्रोष्ठपदासो अनुयन्ति सर्वे ॥  
अहिर्बुध्नियः प्रथमा न एति । श्रेष्ठो देवानामुत मानुषाणाम् ।  
तं ब्राह्मणास्सोमपास्सोम्यासः । प्रोष्ठपदासो अभिरक्षन्ति सर्वे ।  
चत्वार एकमभि कर्म देवाः । प्रोष्ठपदा स इति यान् वदन्ति ।  
ते बुध्नियं परिषद्यं स्तुवन्तः । अहिं रक्षन्ति नमसोपसद्य ॥

पूषा रेवत्यन्वेति पन्थाम् । पुष्टिपती पशुपा वाजबस्त्यौ ।  
 इमानि हव्या प्रयता जुषाणा । सुगैर्नो यानैरुपयातां यज्ञम् ।  
 क्षुद्रान् पशून् रक्षतु रेवती नः । गावो नो अश्वाँ अन्वेतु पूषा ।  
 अन्नँ रक्षन्तौ बहुदा विरूपम् । वाजँ सनुतां यजमानाय यज्ञम् ॥  
 तदश्विनावश्वयुजोपयाताम् । शुभङ्गमिष्टौ सुयमेभिरश्वैः ।  
 स्वं नक्षत्रँ हविषा यजन्तौ । मध्वासम्पृक्तौ यजुषा समक्तौ ।  
 यौ देवानां भिषजौ हव्यवाहौ । विश्वस्य दूतवमृतस्य गोपौ ।  
 तौ नक्षत्रं जुजुषाणोपयाताम् । नमोऽश्विभ्यां कृणुमोऽश्वयुग्भ्याम् ॥  
 अप पाप्मानं भरणीर्भरन्तु । तद्यमो राजा भगवान् विचष्टाम् ।  
 लोकस्य राजा महतो महान् हि । सुगं नः पन्थामभयं कृणोतु ।  
 यस्मिन्नक्षत्रे यम एति राजा । यस्मिन्नेनमभ्यषिचन्त देवाः ।  
 तदस्य चित्रँ हविषा यजाम । अप पाप्मानं भरणीर्भरन्तु ॥  
 निवेशनी सङ्गमनी वसूनां विश्वा रूपाणि वसून्त्यावेशयन्ती ।  
 सहस्रपोषँ सुभगा रराणा सा न आगन्वर्चसा संविदाना ॥  
 यत्ते देवा अदधुर्भागधेयममावास्ये संवसन्तो महित्वा ।  
 सा नो यज्ञं पिपृहि विश्ववारे रयिन्नो धेहि सुभगे सुवीरम् ॥  
 नवो नवो भवति जायमानोऽह्नां केतुरुषसामेत्यग्रे ।  
 भागं देवेभ्यो विदधात्यायन् प्रचन्द्रमास्तिरिति दीर्घमायुः ॥  
 यमादित्या अँ शुमाप्याययन्ति यमक्षितमक्षितयः पिबन्ति ।  
 तेन नो राजा वरुणो बृहस्पतिराप्याययन्तु भुवनस्य गोपाः ॥  
 ये विरूपे समनसा संव्ययन्ती । समानं तन्तुं परितातनाते ।  
 विभू प्रभू अनुभू विश्वतो हुवे । ते नो नक्षत्रे हवमगमेतम् ।  
 वयं देवी ब्रह्मणा संविदानाः । सुरत्नासो देववीतिं दधानाः ।  
 अहोरात्रे हविषा वर्धयन्तः । अति पाप्मानमतिमुत्क्षागमेम ।  
 प्रत्युवदृश्यायती । व्युच्छन्ती दुहिता दिवः ।  
 अपो मही वृणुते चक्षुषा । तमो ज्योतिष्कृणोति सूनरी ।  
 उदुस्त्रियास्सचते सूर्यः । स चा उद्यन्नक्षत्रमर्चिमत् ।  
 तवेदुषो व्युषि सूर्यस्य च । संभक्तेन गमेमहि ।  
 तन्नो नक्षत्रमर्चिमत् । भानुमत्तेज उच्चरत् ।

उपयज्ञमिहागमत् ।

प्रनक्षत्रायदेवाय । इन्द्रायेन्दुं हवामहे ।

स नः सविता सुवत्सनिम् । पुष्टिदां वीरवत्तमम् ।

उदुत्यं जातवेदसं देवं वहन्ति केतवः । दृशे विश्वाय सूर्यम् ।

चित्रं देवानामुदगादनीकं चक्षुर्मित्रस्य वरुणस्याग्नेः ।

आऽप्राद्यावा पृथिवी अन्तरिक्षं सूर्य आत्मा जगतस्तस्थुषश्च ।

आदितिर्न उरुप्यत्वदितिः शर्म यच्छतु । अदितिः पात्वहसः ।

महीमूषु मातरं सुव्रतानामृतस्य पत्नीमवसे हुवेम ।

तुविक्षत्रामजरन्तीमुरूचीं सुशर्माणमदितिं सुप्रणीतम् ।

इदं विष्णुर्विचक्रमे त्रेधा निदधे पदम् । समूढमस्य पांसुरे ।

प्रतद्विष्णुस्तवते वीर्याय । मृगो न भीमः कुचरो गिरिष्ठाः ।

यस्योरुषु त्रिषु विक्रमणेषु । अधिक्षियन्ति भुवनानि विश्वा ।

अग्निर्मूर्धा दिवः ककुत्पतिः पृथिव्या अयम् । अपां रेतांसि जिन्वति ।

भुवो यज्ञस्य रजसश्च नेता यत्रानियुद्धिः सचसे शिवाभिः ।

दिवि मूर्धानं दधिषे सुवषां जिह्वामग्ने चकृषे हव्यवाहम् ।

अनुनोऽद्यानुमतिर्यज्ञं देवेषु मन्यताम् ।

अग्निश्च हव्यवाहनो भवतां दाशुषे मयः ।

अन्विदनुमते त्वं मन्यासै शंच कृधि ।

ऋत्वे दक्षाय नोहि नु प्रण आयूषि तारिषः ।

हव्यवाहमभिमातिषाहम् । रक्षोहणं पृतनासु जिष्णुम् ।

ज्योतिष्मन्तं दीद्यतं पुरन्धिम् । अग्निं स्विष्टकृत माहुवेम ।

स्विष्टमग्ने अभितत्पृणाहि । विश्वा देव पृतना अभिष्य ।

उरुन्नः पन्थां प्रदिशन्विभाहि । ज्योतिष्मद्धेह्यजरन्न आयुः ॥

अग्रये स्वाहा कृत्तिकाभ्यः स्वाहा ।

अम्बायै स्वाहा दुलायै स्वाहा ।

नितन्त्यै स्वाहाऽभ्रयन्तै स्वाहा ।

मेघयन्त्यै स्वाहा वर्षयन्त्यै स्वाहा ।

चुपुणीकायै स्वाहा ।

प्रजापतये स्वाहा रोहिण्यै स्वाहा ।

रोचमानायै स्वाहा प्रजाभ्यः स्वाहा ।

सोमाय स्वाहा मृगशीर्षाय स्वाहा ।

इन्वकाभ्यः स्वाहौषधीभ्यः स्वाहा ।  
 राज्याय स्वाहाऽभिजित्यै स्वाहा ।  
 रुद्राय स्वाहाऽऽर्द्रायै स्वाहा ।  
 पिन्वमानायै स्वाहा पशुभ्यः स्वाहा ।  
 अदित्यै स्वाहा पुनर्वसुभ्याम् ।  
 स्वाहा भूत्यै स्वाहा प्रजात्यै स्वाहा ।  
 बृहस्पतये स्वाहा तिष्याय स्वाहा ।  
 ब्रह्मवर्चसाय स्वाहा ।  
 सर्पेभ्यः स्वाहाऽऽश्रेषाभ्यः स्वाहा ।  
 दन्तशूकेभ्यः स्वाहा ।  
 पितृभ्यः स्वाहा मघाभ्यः ।  
 स्वाहाऽनघाभ्यः स्वाहाऽगदाभ्यः ।  
 स्वाहाऽरुन्धतीभ्यः स्वाहा ।  
 अर्यम्णे स्वाहा फल्गुनीभ्यां स्वाहा ।  
 पशुभ्यः स्वाहा ।  
 भगाय स्वाहा फल्गुनीभ्यां स्वाहा ।  
 श्रेष्ठाय स्वाहा ।  
 सवित्रेस्वाहा हस्ताय ।  
 स्वाहाददते स्वाहा पृणते ।  
 स्वाहा प्रयच्छते स्वाहा प्रतिगृभ्णते स्वाहा ।  
 त्वष्ट्रे स्वाहा चित्रायै स्वाहा ।  
 चैत्राय स्वाहा प्रजायै स्वाहा ।  
 वायवे स्वाहा निष्प्रायै स्वाहा ।  
 कामचाराय स्वाहाऽभिजित्यै स्वाहा ।  
 इन्द्राग्निभ्यां स्वाहा विशाखाभ्यां स्वाहा ।  
 स्नेष्टयाय स्वाहाऽभिजित्यै स्वाहा ।  
 पौर्णमास्यै स्वाहा कामाय स्वाहा गत्यै स्वाहा ।  
 मित्राय स्वाहाऽनूराधेभ्यः स्वाहा ।  
 मित्रधेयाय स्वाहाऽभिजित्यै स्वाहा ।  
 इन्द्रायस्वाहा ज्येष्ठायै स्वाहा ।  
 ज्येष्ठयाय स्वाहाऽभिजित्यै स्वाहा ।  
 प्रजापतये स्वाहा मूलाय स्वाहा ।

प्रजायै स्वाहा ।  
 अद्भ्यः स्वाहाऽषाढाभ्यः स्वाहा ।  
 समुद्राय स्वाहा कामाय स्वाहा ।  
 अभिजित्यै स्वाहा ।  
 विश्वेभ्यो देवेभ्यः स्वाहाऽषाढाभ्यः स्वाहा ।  
 अनपजय्याय स्वाहा जित्यै स्वाहा ।  
 ब्रह्मणे स्वाहाऽभिजिते स्वाहा ।  
 ब्रह्मलोकाय स्वाहाऽभिजित्यै स्वाहा ।  
 विष्णवे स्वाहा श्रोणायै स्वाहा ।  
 श्लोकाय स्वाहा श्रुतायस्स्वाहा ।  
 वसुभ्यः स्वाहा श्रविष्ठाभ्यः स्वाहा ।  
 अग्राय स्वाहा परीत्यै स्वाहा ।  
 वरुणाय स्वाहा शतभिषजे स्वाहा ।  
 भेषजेभ्यः स्वाहा ।  
 अजायैकपदे स्वाहा प्रोष्ठपदेभ्यः स्वाहा ।  
 तेजसे स्वाहा ब्रह्मवर्चसाय स्वाहा ।  
 अहये बुध्नियाय स्वाहा प्रोष्ठपदेभ्यः स्वाहा ।  
 पूष्णे स्वाहा रेवत्यै स्वाहा ।  
 पशुभ्यः स्वाहा ।  
 अश्विभ्यां स्वाहाऽश्वयुग्भ्यां स्वाहा ।  
 श्रोत्राय स्वाहा श्रुत्यै स्वाहा ।  
 यमाय स्वाहाऽपभरणीभ्यः स्वाहा ।  
 राज्याय स्वाहाऽभिजित्यै स्वाहा ।  
 अमावास्यायै स्वाहा कामाय स्वाहा गत्यै स्वाहा ।  
 चन्द्रमसे स्वाहा प्रतीदृश्यायै स्वाहा ।  
 अहोरात्रेभ्यः स्वाहाऽर्धमासेभ्यः स्वाहा ।  
 मासेभ्यः स्वाहर्तुभ्यः स्वाहा ।  
 संवत्सराय स्वाहा ।  
 अह्ने स्वाहा रात्रियै स्वाहा ।  
 अतिमुत्तयै स्वाहा ।  
 उषसे स्वाहा व्युष्टयै स्वाहा ।  
 व्यूषुष्यै स्वाहा व्युच्छन्त्यै स्वाहा ।

व्युष्टायै स्वाहा ।  
 नक्षत्राय स्वाहोदेष्यते स्वाहा ।  
 उद्यते स्वाहोदिताय स्वाहा ।  
 हरसे स्वाहा भरसे स्वाहा ।  
 भ्राजसे स्वाहा तेजसे स्वाहा ।  
 तपसे स्वाहा ब्रह्मवर्चसाय स्वाहा ।  
 सूर्याय स्वाहा नक्षत्रेभ्यः स्वाहा ।  
 प्रतिष्ठायै स्वाहा ।  
 आदित्यै स्वाहा प्रतिष्ठयै स्वाहा ।  
 विष्णवे स्वाहा यज्ञाय स्वाहा ।  
 प्रतिष्ठायै स्वाहा॥

दधिक्राविष्णो अकारिषं जिष्णोरश्वस्य वाजिनः ।  
 सुरभि नो मुखाकरत् प्रण आयूँषि तारिषत् ॥  
 आपोहिष्ठा मयो भुवस्तान ऊर्जे दधातन । महेरणाय चक्षसे ॥  
 योवः शिवतमो रसस्तस्य भाजयतेहनः । उशतीरिव मातरः ॥  
 तस्मा अरं गमाम वो यस्य क्षयाय जिन्वथ । आपो जनयथा च नः ॥

उदुत्तमं वरुणपाशमस्मदवाधमं विमध्यमँ श्रथाय ।  
 अथा वयमादित्यव्रते तवानागसो अदितये स्याम ।  
 अस्तभ्राद् द्यामृषभो अन्तरिक्षममिमीत वरिमाणं पृथिव्या  
 आसीदद्विश्वा भुवनानि सम्राड्विश्वेत्तनि वरुणस्य व्रतानि ।  
 यत्किञ्चेदम् वरुणदैव्यै जनेऽभिद्रोहं मनुष्याश्चरामसि ।  
 अचितीयत्तव धर्मा युयोपिम मा नस्तस्मादेनसो देव रीरिषः ॥

कितवासो यद्रिरिपुर्न दीवि यद्वाघा सत्यमुतयन्न विद्म ।  
 सर्वा ता विष्य शिथिरेव देवथा ते स्याम वरुणप्रियासः ॥

अव ते हेडो वरुण नमोभिरवयज्ञेभिरीमहे हविर्भिः ।  
 क्षयन्नस्मभ्यमसुरप्रचेतो राजन्नेनाँसिशिश्रथः कृतानि॥

तत्त्वायामि ब्रह्मणा वन्दमानस्तदाशास्ते यजमानो हविर्भिः ।  
 अहेडमानो वरुणेह बोध्युरुशँस मा न आयुः प्रमोषीः ॥

(पवमानम्)

हिरण्यवर्णाः शुचयः पावका यासु जातः कश्यपो यास्विन्द्रः ।  
 अग्निं या गर्भम् दधिरे विरूपास्तान आपश्शꣳ स्योना भवन्तु ॥  
 यासाꣳ राजा वरुणो याति मध्ये सत्यानृते अवपश्यम् जनानाम् ।  
 मधुश्चुतश्शुचयो याः पावकास्ता न आपश्शꣳ स्योना भवन्तु ॥  
 यासाम् देवा दिवि कृण्वन्ति भक्षं या अन्तरिक्षे बहुधा भवन्ति ।  
 याः पृथिवीम् पयसोन्दन्ति शुक्रास्ता न आपश्शꣳ स्योना भवन्तु ॥  
 शिवेन मा चक्षुषा पश्यतापश्शिवया तनुवोप स्पृशत त्वचम् मे ।  
 सर्वाꣳ अग्नीꣳ रप्सुषदो हुवो वो मयि वर्चो बलमोजो निधत् ॥  
 पवमानस्सुवर्जनः । पवित्रेण विचर्षणिः ।  
 यः पोता स पुनातु मा । पुनन्तु मा देवजनाः ।  
 पुनन्तु मनवो धिया । पुनन्तु विश्व आयवः ।  
 जातवेदः पवित्रवत् । पवित्रेण पुनाहि मा ।  
 शुक्रेण देवदीद्यत् । अग्ने ऋत्वा ऋतूꣳ रनु ।  
 यत्ते पवित्रमर्चिषि । अग्ने विततमन्तरा ।  
 ब्रह्म तेन पुनीमहे । उभाभ्यां देवसवितः ।  
 पवित्रेण सवेन च । इदं ब्रह्म पुनीमहे ।  
 वैश्वदेवी पुनती देव्यागात् । यस्यै बह्वीस्तनुवो वीतपृष्ठाः ।  
 तया मदन्तः सधमाद्येषु । वयꣳ स्याम पतयो रयीणाम् ।  
 वैश्वानरो रश्मिभिर्मा पुनातु । वातः प्राणेनेषिरो मयो भूः ।  
 ध्यावापृथिवी पयसा पयोभिः । ऋतावरी यज्ञिये मा पुनीताम् ।  
 बृहद्भिः सवितस्तृभिः । वर्षिष्ठैर्देवमन्मभिः ।  
 अग्ने दक्षैः पुनाहि मा । येन देवा अपुनत ।  
 येनापो दिव्यंकशः । तेन दिव्येन ब्रह्मणा ।  
 इदं ब्रह्म पुनीमहे । यः पावमानीरध्येति ।  
 ऋषिभिस्सम्भृतꣳ रसम् । सर्वꣳ स पूतमश्नाति ।  
 स्वदितम् मातरिश्वना । पावमानीर्यो अध्येति ।  
 ऋषिभिस्सम्भृतꣳ रसम् । तस्मै सरस्वती दुहे ।  
 क्षीरꣳ सर्पिर्मधूदकम् । पावमानीस्स्वस्तयनीः ।  
 सुदुधाहि पयस्वतीः । ऋषिभिस्सम्भृतो रसः ।  
 ब्राह्मणेष्वमृतꣳ हितम् । पावमानीर्दिशन्तु नः ।

इमं लोकमथो अमुम् । कामान्थ्समर्धयन्तु नः ।  
 देवीर्देवैः समाभृताः । पावमानीस्वस्त्ययनीः ।  
 सुदुघाहि घृतश्चुतः । ऋषिभिस्संभृतो रसः ।  
 ब्राह्मणेष्वमृतं हितम् । येन देवाः पवित्रेण ।  
 आत्मानं पुनते सदा । तेन सहस्रधारेण ।  
 पावमान्यः पुनन्तु मा । प्राजापत्यम् पवित्रम् ।  
 शतोध्यामं हिरण्मयम् । तेन ब्रह्म विदो वयम् ।  
 पूतं ब्रह्म पुनीमहे । इन्द्रस्सुनीती सहमा पुनातु ।  
 सोमस्वस्त्या वरुणस्समीच्या । यमो रजा प्रमृणाभिः पुनातु मा ।  
 जातवेदा मोर्जयन्त्या पुनातु । भूर्भुवस्सुवः ।

तच्छं योरावृणीमहे । गातुं यज्ञाय ।  
 गातुं यज्ञपतये । दैवीस्वस्तिरस्तु नः ।  
 स्वस्तिर्मानुषेभ्यः । ऊर्ध्वं जिगातु भेषजम् ।  
 शन्नो अस्तु द्विपदे । शं चतुष्पदे ।  
 ॐ शान्तिश्शान्तिश्शान्तिः ।

नमो ब्रह्मणे नमो अस्त्वग्नये नमः पृथिव्यै नम ओषधीभ्यः ।  
 नमो वाचे नमो वाचस्पतये विष्णवे बृहते करोमि ॥

ॐ शान्तिश्शान्तिश्शान्तिः ।

॥ प्रोक्षण मन्त्राः ॥

आपोहिष्ठा मयो भुवस्तान ऊर्जे दधातन । महेरणाय चक्षसे ॥  
 योवः शिवतमो रसस्तस्य भाजयतेहनः । उशतीरिव मातरः ॥  
 तस्मा अरं गमाम वो यस्य क्षयाय जिन्वथ । आपो जनयथा च नः ॥  
 देवस्य त्वा सवितुः प्रसवे । अश्विनोर्बाहुभ्याम् । पूष्णो हस्ताभ्याम् ।  
 अश्विनोर्भेषज्येन । तेजसे ब्रह्मवर्चसायाभिषिञ्चामि ॥  
 देवस्य त्वा सवितुः प्रसवे । अश्विनोर्बाहुभ्याम् । पूष्णो हस्ताभ्याम् ।  
 सरस्वत्यै भेषज्येन । वीर्यायान्नाद्यायाभिषिञ्चामि ॥  
 देवस्य त्वा सवितुः प्रसवे । अश्विनोर्बाहुभ्याम् । पूष्णो हस्ताभ्याम् ।  
 इन्द्रस्येन्द्रियेण । श्रिये यशसे बलायाभिषिञ्चामि ॥

देवस्य त्वा सवितुः प्रसवेऽश्विनोर्बाहुभ्यां पूष्णो हस्ताभ्यां ॐ  
सरस्वत्यै वाचो यन्तुर्यत्रेणाग्नेस्त्वा साम्राज्येनाभिषिञ्चामि ॥

देवस्य त्वा सवितुः प्रसवेऽश्विनोर्बाहुभ्यां पूष्णो हस्ताभ्यां ॐ  
सरस्वत्यै वाचो यन्तुर्यत्रेण बृहस्पतेस्त्वा साम्राज्येनाभिषिञ्चामि ॥

द्रुपदादिव मुञ्चतु । द्रुपदादिवेन्मुमुचानः ।

स्विन्नः स्नात्वी मलादिव । पूतं पवित्रेणेवाज्यम् ।

आपश्शुन्धन्तु मैनसः ।

आपो वा इदं ॐ सर्वं विश्वा भूतान्यापः प्राणा वा आपः

पशव आपोऽन्नमापोऽमृतमापः सम्राडापो विराडापः

स्वराडापश्छन्दा ॐ स्यापो ज्योती ॐ ष्यापो

यजू ॐ ष्यापस्सत्यमापस्सर्वा देवता आपो

भूर्भुवस्सुवराप ॐ ॥

॥ उदकशान्ति - मन्त्रपाठः (निःस्वरः) समाप्तः ॥

Encoded with Accents by Rajagopal Iyer

Proofread by Rajagopal and Krishnan rkiyengar at gmail.com

---

—  
*UdakashAnti Mantra*

pdf was typeset on June 18, 2025

—

Please send corrections to [sanskrit@cheerful.com](mailto:sanskrit@cheerful.com)

